

THURCHI THA JOHANA IRZIAK

1

Ringna thu

1 Leilung insiang ma'n Thu a oma, Thu khah Pathian ziangah a oma, Thu khah Pathian a nit. **2** A tir ata Thu khah Pathian zianga om a nit. **3** I tinreng ama isiam a anit, ai siam ino ite omake. **4** Amaah ringna a om, kha ringna khah miriam invarpu a nit. **5** Ivar khan izing a elinvara, izing khan idan thei make. **6** Pathian mi khatka a oma, ar ming chu Johana a nit. **7** Kha mi khah ivar thurchi mi inre ranga zuang a nit; ama sikin mi tinin an iam theina rangin. **8** Ani khah ivar chu ni maka, ivar thurchi mi inre ranga zuang a nit. **9** Amah hih ivar dik chu a nitrammuala zuanga miriam tin invarpu hi. **10** Thu khah rammualah a oma, Pathianin Thu mangin rammual siam khom se, rammualin lei iham, make. **11** Amah a mihei ziangah a zuanga, ama miheiin lei iham make. **12** Khannisela, ama hamhei ka chu, Pathian nai nitna a pek, ama riming iiamhei chu. **13** Kha mihei kha chu thisenan zir ni maka, taksa nuamlaman zir khom ni maka, ipa nuamlaman zir khom ni ual maka, Pathian ata inzir an nit. **14** Khante, Thu khah miriam ichangin lungkhamna neh thutaka sipin ei laiah a zuang om tak. A roiinpuina ei mu, Pathian nai khat roiinpuina kha. **15** Johanan a chungrichan thu a sira, a kheka, Hi mi thurchi hih ki isir a nit, "Ke nunga zuang rangpu hih keima neka lian ual a nit, ken zir mana om tak a nit sikin" a tia. **16** A lungkham thatvur rikip ei dong lungkham chungah ril thei ban lungkham nokna. **17** Dan thu Mosian a peka, lungkhamna neh thutak chu Krista sikin a om. **18** Tuten Pathian la mu make. A Naipa khat, Pa tangchunga om ngei khan a thurchi a sir tak.

Baptispu Johana thucha

19 Khante, Jerusalema Judahei khan Johana khah tum ai nit itia ridon rangin thiampuhei neh Levia richihe i an tira. **20** Johana khan ifel takkan,

"Messiah chu ni mange," a lei ti peka. **21** Khate, tum ni nit? Elizam ni nit itin an ridona. Ni mange, itin a sama. "Zanthla ni nit mani?" itin an ridon noka. "Ni mange" itin a sama. **22** "Kha nonte tum ni nit" Ne tirhei kin sam theina rangin ne ril roh. Ni thurchi hih ingkam ni ti?" an tia. **23** Johanan zanthla Isaia tong imangin a sama: "Keimah hih ramchara Pumapa lampui siam rei itia khekpu khah ki nit." a tia. **24** Kha palai, Farisaihei hong itir hei khan Johana an ridon noka. **25** "Messiah ni nit noa, Eliza mo, Zanthla mo khom ni nit non te, ithom mi ni baptis?" an tia. **26** Johanan a sama, "Keiman chu tuiin ki baptisa, khannise, nin laiah hin nin irial ino mi khatka a ding tian. **27** Ani khah ke nunga zuang rang a nit, kei chu a pheikok ikheng rang khomin inrup mange," a tia. **28** Khahei khah Bethani khua, Jordan ral, Johanan a baptisna ngai muna an iti a nit.

Pathian Berate

29 Khante, a tukah chu Johanan Jisua a zianga hongin a mua, "En ta u, Pathian Berate, rammual soal ipel rangpu soh" a tia. **30** Hi mi chungrichan hih a nit, "Mi ke nunga zuang a om, khan, keima neka lian ual a nit, keimah ken zir mana om tak a nit sikin" ki ti kha. **31** Tum ai nit rang re mange, nikhomse, Israelhei inre rangin tuia baptis rangin ki zuanga a nit" a tia. **32** Khante Johanan hi thurchi hih a sira, "Rithla khah rivana rithoka zuang itumin vathu angkan a chungah a fuk ki mu. **33** Khankhoma keiman chu la re thei mang, nikhomse, tuia mi baptis ranga ne tirpu, Pathian khan "Rithla khah rivana rithoka zuang itumin vathu angkan tukhok chungah fun mani mung ni ta, kha mi khah Rithla Rithianga mi baptis rangpu a nit," iti a ne lei iril thlam tak a nit. **34** Johanan "Ani khah ki mu tak Nangni ke ril, ani khah Pathian Naipa a nit," a tia.

Jisua koilom masahei

35 Khante, a tuk nokah Johana a dinga, a koilom inika hei neh. **36** Khante, Jisua lon vel khah a mua, "En ta u, Pathian Berate soh" a tia. **37** Khanchu, a koilom inikahei khan a thusir an riata Jisua an zui taka. **38** Jisua ar hela

an hong zui a mu'n chu, an ziangah, "Im nin izong?" a tia. Anni khan, "Rabbi, takam ni om ngai," itin an ridona. (Rabbi chu Minriseipu tina a nit). **39** Ani khan "Hong unla en rei" itin a sama. (Kha zoro khah kholoi dar ilika vel a nit) Kha nung chu an zuia a omna ah mua, khanchu. a ziangah an riak taka. **40** Johana thusir iriaa Jisua zuihei khatka kha chu Andria, Simon Petera unaipa a nit. **41** Ani khan a u Simona a mu zela a ziangah, "Messia khah kin mu tak" a tia. (Messiaa chu Krista itina a nit). **42** Khanchu, ani khan Simona kha Jisua ziangah a thui a. Jisuan Simona khah a lei ena, "Ner ming chu Simona, Johana naipa ni nit, nikhomse, Kifa nang ti tang an ti" a tia. (Kifa chu Petera iti neh munka a nita, a omzia chu 'lungpui' itina a nit).

Jisuan Filipa neh Nathanaela a koi

43 A tukah chu Jisua Galilia fe a tuma, Filipa a mua, ne zui roh a ti peka. **44** (Filipa khah Andria neh Petera omna khua Bethsaida mi a nit). **45** Filipa khan Nathanaela a mua, a ziangah, "A thurchi Mosian Dan lekhabua a irziak neh zanthlaheiin an irziak Josefa naipa Nazareth Jisua khah kin mu tak." itin a rila. **46** Nathanaelan a ziangah, "Nazareth khuah thil itha ai suak thei mani?" itin ar dona. Filipan a ziangah "Hong inla en roh" a tia. **47** Jisuan Nathanaela a zianga hongin a mua, a chungthu a sira, "Amah hih Israel mi dik tak, dik nona reng reng nei ino a nit" a tia. **48** Nathanaelan, "Ingkam ni ne iriat?" itin ar dona. Jisuan a ziangah. "Filipan nang a koi maa theichang kung bulah ni om laiah khan nang ki mu tak keng" itin a sama. **49** Nathanaelan a ziangah, "Minriseipu", Pathian Naipa ni nit! Israelhei Rengpa ni nit" itin a sama. **50** Jisuan a ziangah. "Theichang kung bulah ni om laiah khan nang ki mu tak keng nang ki ti sikin ni iam mani? Hi neka thil roinpui ual ok la mung ni ti," a ti peka. **51** Jisua ngirin an ziangah. "Thutak nangni ke ril: rivan zuang rionga. Miriam Naipa chungga vantirton itum neh ilui la mung nin ti," a tia.

Kana khuua rineina

1 Khante, sun nika nungah Galili rama Kana khuuaah rineina a oma. Jisua nu khom amah khan a oma. **2** Jisua neh a koilomhei khom rineinaah khan an fiala. **3** Khante, uain an ridum khai no sikin, Jisua nu khan a ziangah, "Uain an irsam tak keng" a tia. **4** Jisuan a sama, "Im itho rang hih ni ne ril nang make. Ki zoro la tlung make" a tia. **5** Jisua nu khan isomhei ziangah, "Nangni ai be murdi tho rei," itin a rila. **6** Khante, Judahei risunfai dan angkan lung tuibel irukka a oma, an sikah litar rizaka keng theina chit a nit. **7** Jisuan isomhei ziangah, "Tui belheiah khan tui insip rei" a tia. **8** Khanchu an ziangah, "Atun chu thai unla, ruaithe chongpu ziangah fepui rei" itin a rila. **9** Khaangkan tui khah an choia, uain a hong chang taka, ruaithe chongpu khom khan ar tema. Uain khah taka rithoka mani re make (tui ithala rimang isomheiin chu an riat). Kha nung chu nupui inei rangpu khah a koia, **10** a ziangah, "Mi tinin uain itha an sem baka, nungah khualmiheiin an in zoi nungin chu uain tha ok ino an sem ngaia. Khannise, nang chu atun tenan uain itha ni la sem maia," a ti peka. **11** Hi sinrikhel hih Jisuan Galilia Kana khuah a sina, a roiinpui tlia an langa a koilomheiin amah an iam taka. **12** Kha rizoiin chu, Jisua neh a nu neh a suapuihei neh a koilomhei neh Kapernaum khuah an fea, amah khan sun itoitekah chu an oma.

Jisua tempilah a fe

13 Khante. Judahei Kalkan Ruai a nai tak sikin, Jisua Jerusalemah a tea. **14** Khante, Pathian biak inah siulhei, kelberahei neh vathu zuarhei neh sum inrithleng ngaihei ithung a mua. **15** Khanchu, ruirual a zepna a siama, kelbera neh serat an rengkan Pathian biak in ata a umisuaa, sum inrithleng ngaihei sum khom a thekindar peka, an dochamhei khom a naminkui peka. **16** Khante, vathu zuarhei ziangah khan, "Hintak ata isuapai rei. Ki Pa in hih rivaina inin siam khai no rei," a tia. **17** Khanchu, "Ni ina ki thatnemringaina hin ne fa zoi a ti" iti riziak khah a koilomhei khan an riat nok taka. **18** Khante, Juda thuneituhei khan a ziangah, "Hingkana tho

rangin richam ni nei iti i sinrikelinim ni nen mu rang? an tia. **19** Jisuan an ziangah, "Hi in hih thet unla sum thumkan sininding nok ki ti" a tia. **20** Khante Judahei khan, "Hi in sinna rangah hin kum somilika irukka ai nang a nita, nangman sun thumkan ni sininding nok thei rang mani?" itin an ridona. **21** Khannise, Jisuan tempil ai ti khah ama takpum a nit. **22** Khasikin thina rithokin a thoinokin chu, a koilomheiin hi thu hih a lei isir zoi tak iti an riat suaka, Pathian Lekha Thu neh Jisua thu sir takhei khah an iam taka.

Jisuan miriam nitzia a riat

23 Khante, Kalkan Ruaia Jerusalem khuah a om laiin mi tamkan a sinrikel sikin Jisua an iam taka. **24** Nikhomse, Jisuan kha mihei khah a riat khai sikin an chungah a lung thi maka. **25** >Kha mihei lungril khah a riat vang sikin tuten kha mihei thu khah an iril nang make.

3

Jisua neh Nikodema

1 Khante, Farisaihei laia mi khatka ar ming Nikodema, Judahei ruaitu a oma; **2** kha mi khah zanah Jisua ziangah a hongga, a ziangah "Rabbi, Pathian ziang ata minriseipua zuang ni nit iti kin riat, Pathian an chungah a om non chu tuten hingkana sinrikel hih tho thei no ni" a tia. **3** Jisuan a sama, "Thudik nang ke ril: mi tukhom a suaknok non chu Pathian Ram mu thei no ni," a tia. **4** Nikodeman a ziangah. "Ingkanim mi a unlian nungin a suaknok rang? A nu sunga lutin voi nika suaknok thei no ni," a tia. **5** Jisuan "Thutak nang ki iril a nit. Tukhom tuiah neh Rithlah a suaknok non chu Pathian Ram lut thei no ni. **6** Taksaan zir ka chu taksa mi an nita. Rithlaan zir ka chu rithla mi an nit. **7** Ni suaknok rang keng ki ti hih arkel ti no roh. **8** Phaivua hih a nuamna tiang tiang a ranga, a sintho ri khom ni riat. Khannise, tak tianga hong rithok mani tak tiangim ai fe rang iti chu re mak che. Ama angkaan a nit, mi tukhom Rithlaa suaknok chu," a ti peka. **9**

Nikodeman "Ingkanim a nit thei ranga?" itin a sama. **10** Jisuan a ziangah, "Israelhei laia minriseipu lian ni nita, hi thu hih ni riat thei ino mani? **11** Thudik nang ke ril: Kin iti hih kin iriata a nit, kin isir khom hih kin imu a nit; khannise, kin thusir tuten iham nuamak chei. **12** Rammuala thil ki isir ilua nin iham non te, ingkam rivan thil ki isirah hih nin ne iam thei ranga? **13** Mi tute rivana hang ife tak la omake, Naipa ti no chu. Naipa chu rivana rithoka zuang a nit. **14** Khante, Mosian ramcharah dar irul a ikhai angkah khan Miriam Naipa khom ikhaiin ai om nget rang a nit. **15** Tukhom ama iam kan chu kumtluang ringna an nei theina rangin. **16** Pathianin rammual lung a thlung tak tak sikin a Naipa neisun a peka; tukhom ama iam kan chu thi loia kumtluang ringna an nei theina rangin. **17** Pathianin rammual thiamno inchang rangin a Naipa rammualah zuk tir maka, rammual inring rangin a zuk itir lem a nit. **18** Tukhom Naipa iam chu thiamno changin om no nia, tukhom a iam ino chu atun ata thiamno changin an om, Pathian Nai khat an iam no sikin. **19** Amah hih thiamno changna chu a nit: ivar rammualah a zuanga, khannise, miheiin ivar nekan izing an kan ual, an sinthohei a soal sikin. **20** Tukhom sin isual itho kan chu ivar an nela, ivarah hong ngai mak; an sin insual inlang an nuam no sikin. **21** Thil idik isinhei chu Pathian thuzomna neia sin an nit iti ivarin an lang theina rangin ivarah an hong ngai.

Jisua neh Johana

22 Kha rizoiin chu, Jisua khah a koilomhei neh Judai ramah an tea, amah khan an laia omin a baptisa. **23** Johana khomin Aionah, Salim kho kolah khan mi a baptis ngaia, kha munah khan tui a tam sikin. Mipuhei a ziangah an fea, a lei baptis ngaia. **24** (Kha zoroah khan Johana tang inah la khum make). **25** Khante, Johana koilom thenkahei neh Juda khatka faina dan buah an rikhala. **26** Khanchu, Johana ziangah an fea, "Minriseipu, Jordan ral sua lam tianga ni zianga om, a thu ni isir ngai khah ni la riatim? Ani khan mi a baptisa mi murdi a ziang tiang keng an fe tak" an tia. **27** Johanan a sama, "Miriamin ite nei make, Pathian pek a nit non chu. **28** Keimah hih Messia ni mange, khan, a matona tir ki nit ki ti khah nangmani

reng ki riatpuituhei nin nit. **29** Moineipu chu a pasal khah a nit; nikhomse, moineipu rual idinga a he ringai tian ka omin a roi a riatin chu a lom tak tak ngai. Khaangkan, ki lomna inrikipin ai om a nit. **30** Ani chu a lian tir tir rang a nita, keimah chu a chin tir tir rang ki nit.

Rivana rithoka zuangpu

31 Chung tianga rithoka zuangpu chu mi tin tin neka an chung tak a nit; rinengan zir chu rinenga mi a nit, rineng thu a sir ngai, khannise, rivana rithoka zuangpu chu mi tin tin neka an chung tak a nit. **32** Ai mu neh ai riat a sira, nikhomse, tuten a thusir iham make. **33** Khannise, a thusir iham kan chu Pathian chu mi diktak a nit iti ai nam indet a nit. **34** Pathian itirpun chu Pathian thu a sir ngai, Pathianin ama Rithla rikip a pek sikin. **35** Pan a Naipa lung a thlunga, thil tinreng a kutah a pek khai tak. **36** Tukhom Naipa iam kan chu kumtluang ringna an nei tak; tukhom Naipa thu zom ino chu ringna nei no nia, Pathian ningthikna an chungah om mai lem a ti" a tia.

4

Jisua neh Samari Nupangnu

1 Khante, Farisaihei khan Johana nekan Jisuan koilom itam ual a siam iti neh mi a baptis intam ual iti an riat taka. (**2** A dik takkan, Jisuan chu tute baptis mak, a koilomhei ibaptis ngai a nit.) **3** Khasikin Jisuan kha an iti khah a riatin Judai ram a maka, Galili tiang a kir noka; **4** a fe tiang Samari ram a ro rang ai nang a nit. **5** Khante, Samari rama khua khatka Sukar an iti khah a hong tlunga, Jokoban a nai Josefa mun ai pek koi khah a nit. **6** Jakoba tuikuang khom khah khan a oma, Jisua a lam lonna sol khah tuikuang kolah khan a thung raka, chonung tiang a nit taka. **7** Khante, Samari nupang khatka tui ichoi rangin a hongga, Jisuan a ziangah, "Tui iin rang ne pe roh" a tia. **8** (A koilomhei chu ifarua richo rangin khuaah an fea). **9** Nupangnu khan a ziangah, "Nangmah Juda ni nita, keimah Samari

nupang ki nita, ingkan nganim iin rang ni ne ni tlia?" (Judaheiin kuri mo, bel mo, Samarihei imang tak chu mang khai ngai mak). **10** Khante Jisuan a sama, "Pathian thilpek neh Tin rang ne pe roh, ni zianga tipu hih ni riat nise chu, nangman keng a ziangah zong nita; khanchu, aman ringna tui nang ai pek lem rang a nit," a tia. **11** Khante, nupangnu khan a ziangah, "Epu tui thalna lak ite nei mak chea, tuikuang lak an thuk vita. Takam ringna tui ni mu ranga? **12** Kin pu Jakob an hi tuikuang hih a ne peka, amah neh a naihei neh a sa vaihei khomin an lei iin ngai a nit. Kin pu Jakoba nekan ni roinpui ual mani? **13** Jisuan a sama a tiangah, "Tutu hi tui iin chu an tui lar hal nok a ti; **14** nikhomse, tukhom an zianga ki pek rang tui iin ka chu an tui rihal nok tlak khai no ni. Keiman tui ki pek rang chu, an sungah tuinar hong chang a ta, kha tuinar khan ringna tui neh kumtluang ringna peng a ti," a tia. **15** Khanchu, nupangnu khan a ziangah, "Epu, kha tui khah ne pe roh! Ki tui ar hal khai nona rangin neh hi ten ten tui ichoi ki hong khai nona rangin," a tia. **16** Jisuan a ziangah, "Fen la, ni pasal va koi inla, hong nok roh" a ti peka. **17** Nupangnu khan a ziangah, "Pasal nei mange" a tia. Jisuan a ziangah, "Pasal nei mange, ni ti hih ni tin dik a nit. **18** Pasal ringaka ni nei tak a nita, atuna ni ompuipu khom hih ni pasal ni make. Thudik tak ni ne iril a nit" a tia. **19** Nupangnu khan a sama, "Epu, zanthla ni nit iti ki riat tak. **20** Kin chibulheiin chu hi tiangah hin Pathian chubai an un ngai, khannise, nangni Judaheiin chu, Pathian chubai unna rang mun chu Jerusalem a nit nin ti ngai" a tia. **21** Khante Jisuan a ziangah, "Nupangnu, keimah ne iam roh, hi tiangah neh Jerusalemah nget nino khom, miheiin pa chubai an un zoro a tlung rang tak. **22** Nangmani Samariheiin chu nin iriat ino chubai nin una, keimani Judaheiin chu kin iriat chubai kin iun ngai a nit; inringna hih Judaheia rithoka hong isuak keng ai nit. **23** Khasikin zoro ai tlung rang tak a nit, atun khom ai tlung zel a nit tak, kha tikin chu Pathian chubai iunheiin Rithla neh Thutakin Pa chubai un an ti, Pan khangkana mihei khah amah chubai iun rangin ai zong a nit. **24** Patihan chu Rithla a nita, amah chubai iunheiin Rithla neh Thutakin an un rang a nit," a tia. **25** Nupangnu khan a ziangah, "Messia la zuang a ti iti ki riat, a zuang tikin chu i tinreng ne ril a ti" a tia. **26** Jisuan a ziangah, "Keimah nang risonpuipu hih ani khah ki nit" a tia. **27** Kha lai takah khan

a koilomhei an hong kir noka, nupang neh an rison an mua an ringai ar khel oka. Khannise, tuten, "Im ni zong? Ithom nupang ni irsonpui? iti khom ridon make. **28** Khante, nupangnu khan a tuibel imarakin khosungah a fe noka, mihei ziangah, **29** "Ki sintho tinreng ne ril khaipu mi khatka a oma, hong unla, hong en ta u. Messia ni thei a tim?" a tia. **30** Kha nung chu an khua ata an hong suaka Jisua ziangah an fe taka. **31** Kha karah khan koilomhei khan "Minriseipu, fak zong hi roh" itin an lei riphata. **32** Khannise, Jisuan an ziangah, "Nin iriat ino bu ine rang ki nei" a tia. **33** Khante, koilomhei khah an khatin an risona, "Mi'n bu an hong ichoi pek mani?" an tia. **34** Khante, Jisuan an ziangah, "Ne tirpu lungdo sin neh a sin izoi hih ki bu a nit" a tia. **35** Nangmanin bu atna rang thla lika a la om nin iti ni makima? Ringai ta u, nangni ke ril, tang unla, loihei en ta u, atun ata iat rangin buhei an min tak. **36** A atpun chu thalo a mu ngaia, kumtluang ringna dena om rangin ira a bum ngai; a tupu neh a atpu an lom inrual theina rangin. **37** "Mi khatkan a tua, mi dangin a at ngai'iti hih a idik a nit. **38** Nin sinna no munah keng nangni ki tir; mi dangin an sina, an isinisa khah nin iat a nit" a tia. **39** Khante, nupangnu khan, "Ki sintho tinreng a ne ril khai" itin thu a sir sikin Samari kho mi itam takkan Jisya an iam taka. **40** Khanchu, Samari kho mihei khan Jisua ziangah an hong, an zianga om rangin an ngena. Khanchu, Jisua kha khuah khan sun nika a cham taka. **41** Mi tam takkan a thusir sikin an iam taka. **42** Khanchu, anni khan nupangnu ziangah khan "Atun chu ni ne sir pek sik ni khai loiin keimani ngeiin a thu sir kin riata, hi mi hih rammual Inringpu a nit nget iti kin riat tak" an tia.

Jisuan sorkar ulian nai an dam

43 Khante, kha khuah khan sun nika a mang zoi nungin Galili ramah a fea. **44** Jisuan "Zanthla chu ama khuah chu choiinrisangin om ngai make" itia a lei isir tak angkan. **45** Galili ram a hong tlungin chu mipuiin an lei lom, Jerusalema Kalkan Ruaiah khan itangin Jisua sintho tinreng khah an mu sikin. **46** Khante, Jisua khah Galili ram Kana khuah tui uain an changnah khan a hong noka, sorkar ulian khatka a lei oma a naipa Kapernaum khuaa dam ino a nit. **47** Jisua Judai ram ata Galili ramah a hong iti a riat kaneh a

ziangah a fea, Kapernaum khuah ifea a naipa zun dam pek rangin Jisua a ngena, a naipa khah a thi lok lok tak a nit. **48** Jisuan a ziangah, "Sinrikhel neh thilrikhelhei nin mu non chu tuten iam no tin u" a tia. **49** Khante, sorkar ulian khan a ziangah, "Epu, ki naipa a thi ma'n ne zuang pek roh" a tia. **50** Jisuan a ziangah. "Fe nok ta roh, ni naipa a dam tak" a ti peka. Khanchu, Jisua tong iiam pumin a fe taka. **51** Khante, a in a pan laiin lampuiah a somheiin an tonga, "Ni naipa a dam tak" an ti peka. **52** Khante, ani khan an ziangah. a naipa dam zoro tak khah ar dona. Anni khan a ziangah. "Mizan kholoi dar khatka ta an, khur ai boi tak a nit" an tia. **53** Khanchu, a pa khan Jisuan a ziangah "Ni naipa a dam tak" a ti lai tak khah a nit iti a riat taka. Kha nung chu, amah neh a inmihei, an rengkan an iam khai taka. **54** Amah khah Jisuan Judai ram ata Galili ramah a hong nunga a sinrikhel a voinikna a nit.

5

Jisuan dilah mi an damna

1 Kha rizoiin chu, Jisua Jerusalem khuah a fea, Judahei ruaithe a om sikin. **2** Khante. Jerusalema Bera daikot kolah khan dil khatka a oma, kha dil khan thapuk ringaka a neia; Hebrai tongin Bethesda an ti ngai. **3** Amah khan dam inohei, mitidelhei, kebaihei, izenghei itam takka an oma, tui chang zoro an ngaka, **4** a kar karah dilah khan vantirton a zuanga, tui khah an chang ngai. Kha tui chang zoroa dila lut ka chu ingka natna khom nise an idam ngai a nit. **5** Khante, mi khatka kum somithumka iriatka dam ino a oma. **6** Jisuan a zalin a mua, isot takka dam khai ino a nit iti a riata, a ziangah, "Indam ni nuamim?" itin ar dona. **7** Khante, dam ino khan, "Epu, tui chang zoroa dila ne zu thak rang nei mange; ki fe khomin mi'n an ne khel nok ngai" itin a sama. **8** Jisuan a ziangah, "Thoi inla, ni puantha choi inla, lon ta roh" a ti peka. **9** Khanchu, kha mi khah voikarengin a hong dam zela, a puantha a choia a fe taka. Kha nikhua khah Sabbathni a nit. **10** Khasikin Judaheiin a dam takpu ziangah, "Vuani hih Sabbathni keng ai nit, puantha choia lon hih ei dan ni make" an tia. **11** Khante, ani khan an

ziangah, "Nen dampun, 'ni puantha choi inla, lon ta roh' a ne iti keng" itin a sama. **12** Anni khan, "Hingkana tho ranga nang irilpu hih tum ai nit?" itin an ridona. **13** Khannise, kha a dampu khan Jisua khah tum ai nit re make, kha munah khan mipui an tam sikin Jisua chu a rot pat taka. **14** A nakanah chu Jisuan ani khah Pathian biak inah a mua, a ziangah, "Ringai roh, ni dam tak a nit, isual nok khai no roh, kha non chu ni chungah natna thano ual a tlung loiin" a tia. **15** Kha nung chu kha mi khan Judahei ziangah an dampu chu Jisua a nit iti a va rila. **16** Khanchu, Sabbathnin mi an dam iti sikin Jisua khah nuamning an lo taka. **17** Jisuan an ziangah, "Ki Pan sin a tho mai ngaia, kei khom sin ki tho nget rang a nit" itin a sama. **18** Khangkan a ti sikin Judaheiin ithat rangin an tum nok ual tak. Sabbathni dan a siat iti sik bang ni loiin, Pathian khah a pa angkaan a bea, amah khom Pathian neh riangin ar be iti sik khomin a nit.

[Naipa richamneina](#)

19 Khante, Jisuan anni khah a sama. "Thudik tak nangni ke ril: naipan a khatin ite tho thei make; Pa sintho ai mu banah chu. Pan sin ai tho kah Naipa khomin ai tho a nit. **20** Pan Naipa lung a thlunga, ai tho murdi a inmu ngai a nit. Hi neka sin roiinpui a tho rang khom lan mung a ti, khah tikin chu nin ringai lar khel a ti. **21** Pan ithi a thoia ringna ai pek ngai angkaan, Naipa khomin ai nuam ka chu an ring ngai. **22** Pan tute roi rel pek ngai mak, roi rel rangin Naipa ziangah richamneina ai pek lem a nit, **23** mi murdin Pa marit an itho angkaan naipa khom marit an tho theina rangin. Tukhom Naipa marit tho no ka chu Pa a tirpu marit tho no a nit. **24** "Thudik tak nangni ke ril: Tukhom ki tong iriaa ne tirpu iam kan chu kumtluang ringna an nei tak, thiamno changin omaka, thina rithokin a suaka ringnaah ai lut tak a nit. **25** Thudik tak nangni ke ril: a zoro a thlung rang tak, atun khom a tlung mai tak, kha tikin chu ithiheiin Pathian Naipa roi riang an ta, a ria ka chu ring an ti. **26** Pa khah ringna nar ai nit angkaan naipa khom ringna narin ai siam a nit. **27** Khante, Miriam Naipa a nit sikin a ziangah roi irel ranga richamneina ai pek a nit. **28** Amah hih ar khel ti no rei; a zoro a tlung rang tak. kha tikin chu ithiheiin a roi riang an ta, **29**

yithlan ata hong thoi khai an ti, sin itha sinhei chu ringna changin thoinok an ta, sin isual isinhei chu thiamno changin thoinok an ti.

Jisua riatpuituhei

30 Ki khata richamneinan ite tho thei mange; Pathian ne ril lam angkan roi ki rel a nit. Khasikin ki roirel chu a dik a nit. Keima inuam hih isin tum manga, ne tirpu nuamlam keng isin ki tum. **31** Mahni thurchi isir inlang, ki thusir idik no ni. **32** Ki thurchi mi'n repu chu mi dang a nit; ani khan ki thurchi a isir khah a dik iti ki riat. **33** Nangmanin Johana ziangah mi nin tira, ani khan thutak rithulin thu nangni a lei iril. **34** Miriam riatpuitu ki nei nget rang ki ti ni maka, nangmani inringa nin om theina ranga a nit. **35** Johana khah meiser ivartak nehrieltak angkah a nit, a var la manginchoi nin inuama nit kha. **36** Khannise, riatpuitu ki nei hih Johana inriatna tong nekan a roiinpui ual. Pan sin itho ranga a ne ipek, ki sintho ngei hin Pa ne itir a nit iti ki thurchi a inriat a nit. **37** Pa ne tirpu khom khan ki thurchi an riat taka. Nangnin chu tik lai khomin a roi la re ngai mak chei, a mel khom la mu mak chei. **38** A thu khom nin lungrilah vong ngai mak chei, ai tirah hih nin iam no sikin. **39** Pathian Thubu nin tepinchial ngai, a sungah kumtluang ringna omin nin tung sikin. Kha Pathian Thubuhei ngei khan ki thurchi an isir a nit. **40** Khannise, ringna nei rangin ki ziangah hong nuam ngai mak chei. **41** "Miriam inpakna zong mange." **42** Ingkana mi'm nin init nangni ki riat, nin lungrilah Pathian lungthlungna nei mak chei u. **43** Ki Pa richamneina neh ki zuang a nita nikhomse, ne ham mak chei. Mi dang mahni richamin hong se chu lei iham nin ti. **44** Nin khata inpak risak keng nin inluta. Pathiana rithoka inpakna zong nuam iloi chei, ingkam nin ne iam rang? **45** Keiman Pa makungah nangni doi ki ti son no rei. Nangni doi rang chu mi khatka a om, nin iiam Mosia hi. **46** Mosia nin iamin chu kei khom nin ne iam rang a nit; ani khan keima thurchi keng a irziak. **47** Nikhomse, a irziak nin iam non te, ingkanim ki tong nin iam thei ranga?" a tia.

Jisuan mi sang ringaka a vai thu

1 Kha rizoiin chu, Jisua Galili dil ral tiang a fe taka. (Tiberia dil khom an ti sa ngai). **2** Dam inohei chung a sinrikhel an mu sikin mi itamkan an zuia. **3** Khante, Jisua khah itlangah a fea, a koilomhei neh an ithunga. **4** Kalkan Ruai zoro khah a nai taka. **5** Khante, Jisuan a kolkiang a hei ena, mi itamka a ziang tianga hongin a mua, Filipa ziangah, "Hi mihei fak rangin takam ibai ei richok rang?" a tia. **6** (Kha tong khah Filipa risinna ranga ai ti a nit, a tho rang dan chu aman a riat tian). **7** Filipan a ziangah, "Mi tin ichintek teka dong rang khomin duli riza nika man ibai khomin dum no ni" itin a sama. **8** A koilomhei laia khatka, Simon Petera suapui Andrian a ziangah, **9** "Barli bai ringaka neh inga inika nei naipangte khatka hin a oma, khannise, hi zaka mihei fak rangin chu ite chang no ni." a tia. **10** Khante, Jisuan, "Mihei khah inthung rei" a tia. (Kha munah khan loisul itam takka a om) Mihei khah an ithung taka, sang ringaka vel an nit. **11** Jisuan ibai khah a laka. Pathian ziangah lomthu a sira, mi a thunghei khah a sem peka; khangka ngirin inga khom an nuam dorka a sem peka. **12** An khop khai nungin a koilomhei ziangah, "Ite ripai loi rangin fakban khom rut khai rei" a tia. **13** Khanchu, an ruta, barli bai ringaka fahei fakban khah khamlu somleinika a la sipa. **14** Khante, kha mihei khan Jisua sinrikhel khah an mun chu. "Hi mi hih Zanthla, rammuala zuang rangpu khah a nil nget" an tia. **15** Khanchu, ani khah zalrata manin ilala siam an tum iti Jisuan a riat sikin a khatin itlangah a fe nok taka.

Jisua tui chungah a lon

16 Khante, kholoi a hong nitin chu, Jisua koilomhei khah dilah an zu fea, **17** rikuangah an chuanga dil ral Kapernaum tiang an pana. Zan a hong nit tenan khom Jisua an ziang la hong tlung maka. **18** Thlipui a hong ranga tui an risoka. **19** Khante, koilomhei khan kilomitar ringaka mani irukka mani an hei ikarin chu Jisua khah dil chungah lonin an tianga hong ipunin an mua, an ti taka. **20** Khannisela, ani khan an ziangah, "Keimah keng ki nit, ti no rei" a tia. **21** Khanung chu rikuangah khan an inchuanga, rikuang khan an

ipan imuang khah a tlung zel tak.

Mipuiheiin Jisua an zong

22 Atukah chu dil ral kiang tianga mipui iomhei khan, rikuang khatka bang a oma, Jisua chu a koilomhei neh rikuangah chuang maka, an khata fe an nit iti an riata. **23** Pumapan lomthu a sir zoia ibai an fakna mun kolah khan rikuang danghei Tiberia rithokin an hong tlunga. **24** Khante, mipuiheiin Jisua neh a koilomhei khah kha munah khan om khai mak iti an riatin chu anni khom rikuanga chuangin Kapernaumah Jisua zong rangin an fe taka.

Jisua, ringna bai

25 Khante, mipuihei khan dil ralah an hong mu'n chu a ziangah, "Minriseipu, tik zoroa hi tiang ral ni hong itlungim?" an tia. **26** Jisuan an ziangah, "Thudik tak nangni ke ril: sinrikhel nin mu sika nin ne izong ni maka, ibai nin fak sik neh nin irsam murdi nin mu sika nin ne izong keng. **27** Ibai a se nok thei zel rangin sin no unla, kumtluang ringna chang rang ibai rangin sin lem rei. Kha bai khah Miriam Naipan nangni peng a ti, Pathian. Pa khan amah risin a sia tak sikin" a tia. **28** Anni khan a ziangah, "Pathian lungdo kin sin theina rangin im kin sin rang?" itin an ridona. **29** Jisuan a sama, "Pathianin isin ranga nangni ai nuam chu a mi tir iiam hih a nit" a tia. **30** Anni khan a ziangah, "I sinrikhelim ni sin rang, kin mua nang kin iam theina rangin? Im ni tho rang? **31** Kin chibulheiin chu ramcharah khan manna an fak ngaia, Pathian Thubu'n, Rivana rithokin ifah rang ibai a pek ai ti angkan" an tia. **32** Jisuan an ziangah, "Thudik tak nangni ke ril, Mosian ibai nangni ai pek khah rivana rithoka ni make; ki Pan keng rivana rithokin ibai dik tak nangni ai pek. **33** Pathianin ibai nangni ai pek chu, rivana rithoka zuang ituma rammual ranga a ringna pepu hih a nit" a tia. **34** Anni khan a ziangah, "Epu, kha bai khah ne pe mai roh" an tia. **35** Jisuan an ziangah, "Keimah hih ringna bai ki nit. Tukhom ki zianga hong chu a vontam no nia, tukhom keima ne iam chu a tuirihal khai no ni. **36**

Khannise, nangni chu nin ne mu khomin ne iam mak chei. **37** Pan a ne ipekhei ka chu ki ziangah hong an ti. Ki zianga hong ka chu tute umisua tlak no ning. **38** Mahni lungdo sin ranga rivana rithoka zuang ni manga, ne tirpu lungdo sin rang a zuang keng ki nit. **39** Amah hih ne tirpu lungdo chu a nit, a ne ipekhei murdi tute inrimang loiin nikhua nungkhonah chu kaiithoi lem inlang" iti hi. **40** "Ki Pan ai nuam tak chu tukhom Naipa mua a iam murdin chu kumtluang ringna nei sela, keiman nikhua nungkhonah khahei khah kaiithoi inlang iti hih a nit" a tia. **41** Khante, "Rivana rithoka ibai zuang itum ki nit" a ti sikin mipui a chungah an riphuna. **42** "Hi mi hih Josefa naipa Jisua khah ni makima? a nu neh a pa khom ei riat. 'Ingkanim rivana rithoka zuang itum ki nit' a ti thei tlia hi?" an tia. **43** Jisuan an ziangah, "Riphun ki keng no rei. **44** Pa ne tirpun ar kuai non chu tute ki ziangah hong thei no ni; khanchu, keiman nikhua nungkhonah chu kaiithoi ki ti. **45** Zanthlahei lekhabuah, 'Pathian inriseiin om khai an ti' iti riziak a nit. Mi tin Pa thu riasa riseihei ka chu ki ziangah an hong ngai. **46** Tuten Pa an mu tak ki ti ni make. Pa ziang ata zuangpu bangin keng; ani khan chu Pa ai mu a nit. **47** Thudik tak nangni ke ril, tukhom a iam kan chu kumtluang ringna an nei tak. **48** Keimah hih ringna bai ki nit. **49** Nin chibulheiin ramcharah manna kha an faka chu an ithi ngir a nit. **50** Khannise, rivana rithoka ibai zuang itum hi chu tukhomin a fakin thi khai no ni. **51** Keimah hih ibai iring rivana rithoka zuang itum ki nit. Tukhomin hi bai hih a fakin chu kumkhuantluangkan ring mai a ti. Ibai ki pek rang chu ki taksa hih a nit, rammual ringna ranga ki pek rang khom ki taksa hih a nit" a tia. **52** Kha nung chu, Judahei khah an khatin an rikhala. "Ingkanim hi mi hin a taksa ifah rangin a ne pek thei ranga?" an tia. **53** Jisuan an ziangah, "Thudik tak nangni ke ril: Miriam Naipa taksa hih nin fak noa, a thisen khom nin in non chu nin khatin ringna nei no tin u. **54** Tukhom ki taksa faa, ki thisen iinin chu kumtluang ringna a nei tak, ani khah keiman nikhua nungkhonah kaiithoi ki ti. **55** Ki taksa hih bu dik tak a nita; ki thisen hih iinrua tak a nit. **56** Tukhom ki taksa faa, ki thisen iin ka chu keimaah a om maia kei khom amaah ki om mai ngai. **57** Pa ring khan a ne tira, Pa zara ring ki nit. Khaangkan ne fa tak ka chu keima zarin ring an ti. **58** Amah hih rivana rithoka ibai zuang itum chu a nit, nin chibulheiin

an faka an ithi nok angkah ni make; tukhom hi bai if a chu kumkhuantlungkan ring mai a ti" a tia. **59** Hi tong hih Jisuan Kapernaum inkhom inah an risei laia ai ti a nit.

Kumkhuantluangka ringna thu

60 A koilom itam takkaheiin kha thu khah an riatin, "Hi inriseina hih thu khir tak keng. Tum a re thiam ranga?" an tia. **61** Khanchu, kha thua riphun an nit iti Jisuan a lungrilin a riata, an ziangah, "Kha thu khan nin ilung a inhoi ino mani? **62** Miriam Naipa hih masaa a omna ngaijah a kir nin mu tikah ingkam nin tho rang? **63** Ringna pepu chu Pathian Rithla a nit, miriam ritha chu ite a mangna omake. Nin zianga thu ki isir hih ringna pepu Pathian Rithla a nit. **64** Nikhomse, thenkan chu iam mak chei" a tia. (Jisuan a tir ata tuheim a iam ino rang neh tukhokim ama'n man rang a riat tian) **65** Khante, amah ngirin an ziangah, "Hi sikah hin keng, 'Pan a tangpui non chu tute ki ziangah hong thei no ni' ki ti kha" a tia. **66** Kha sikah khan Jisua nung izuihei itam takkan nungkir an thoa, amah zui khai make. **67** Khanchu, Jisuan koilom somleinikahei ziangah, "Nangni te a ro nin nuamim?" itin ar dona. **68** Simon Peteran a ziangah, "Pumapa, tu ziangam kin rot ranga' Kumtluang ringna laka nangman ni neia. **69** Atun chu kin iama, Pathiana rithoka zuang Mirthiang ni nit iti kin riat tak" a tia. **70** Jisuan an ziangah, "Nangmani somleinikahei hih keima nangni irthlang ni makima? Khankhoma nin laia mi khatka chu diabola a nit" a tia. **71** Ani khan Simon Iskariota naipa Juda thurchi a isir a nit. Juda khah koilom somleinikahei laia mi ni khom se, amah an man rang sikin.

7

Jisua neh a suapuihei

1 Kha rizoiin chu Jisuan Galili ram ar fanga; Judaheiin amah ithat an tum sikin Judai ram chu rifang nuamaka. **2** Khante. Judahei Dangdi Ruai a nai taka. **3** Khasikin, a suapuihei khan Jisua ziangah, "Hi mun hih man la,

Judai ramah fe roh, ni koilomheiin ni sintho an mu theina rangin. **4** Tuten inrukkan ite tho ngai make, mahni riming inthang inuam chak kan. Hi sinhei hih ni sin a nitin te rammualin nang re rise" an tia. **5** (A suapuihei iluan amah iam make). **6** Jisuan an ziangah. "Ki zoro dik tak la tlung make. Nangmani zoro chu ai tlung mai a nit. **7** Rammualin nangni nei thei mak, khan, keimah chu a ne nei ngai, a sinthohei an sual iti ke ril ngai sikin. **8** Ruaithenah nangmani lei fe rei, kei chu la fe thei hi no ninge, ki zoro dik tak a la tlung no sikin" a tia. **9** Kha tong khah a ti zoi khomin ani chu Galili rama a la om maia.

Jisua Dangdi Ruaitheah a tang thu

10 Khante, a suapuihei Ruaithenah khan an fe zoiin Jisua khom inrukkan a fe saa. **11** Judaheiin Ruaithenah khan amah an zonga, "Takam ai om?" itin an ridon vela. **12** Mipuihei a chungrichanah an risela, thenkan "Miriam itha a nit" an tia; thenkan, "Ni make, amah keng mi'n buai ngai" an tia. **13** Khannise, Juda thuneituhei an ti sikin tuten a langin chu a chungchang thu isir ngam maka. **14** Ruaithe khah ar tena dor an mang tenan chu Jisua Biak inah a fea mihei an riseia. **15** Judahei khah an ringai ar khel oka, "Hi mi hih riseina boiin ingkam a riat bak tlia" an tia. **16** Jisuan a sama an ziangah, "Ki inrisei thu hih keima ta ni maka. Pathian ne tirpu ta a nit. **17** Tutu khom Pathian lungdo sin nuamkan chu hi inriseina thu hih Pathian zianga rithokim keima iphuatotim riang an ti. **18** Tukhom mahni iphuatot thu sir chu mahni roinpuina rang izong a nit. Khannise, a tirpu roinpuina rang izongin chu dikna a neia, amaah diknona reng omake. **19** Mosian Dan nangni ai pek ni makima? Nikhomse, Dan khah tuten zom mak chei. Ithom ne that nin itum hi?" a tia. **20** Khante, mipuihei khan, "Ramrili iman ni nit hite, tum nang ithat itum?" an tia an sama. **21** Jisuan an ziangah, "Sinrikhel khatka ki sina, nin rengkan nin ringai nin inrikhela. **22** Mosian nin naiipahei ser itan rangin thu nangni a peka (Mosia iphut ni maka, nin chibulhei iphut a nit) khasikin Sabbathnin ser nin itan ngai a nit. **23** Mosia Dan siat nona rangin Sabbathni khomin ser nin tan ngaiin te, keiman Sabbathnia mi ki indam chu ithom ki chungah nin ilung ai hoi ino? **24** Pu tianga lang lam

paiin ngaitua no unla, idik takkan ngaitua lem rei" a tia.

Ani hih Messia ai nit mani?

25 Khante, Jerusalem khuaa mi thenkan, "Hi mi hih ithat an itumpu khah ni makima? **26** En ta u! Mipui riatah thu a sira, tuten rikok make! Ani hih Messia a nit iti an iriat titak tak mani o? **27** Khannise, Messia a zuang tikin chu tuten a zuang rithokna re no ni. Hi mi hih chu ar thokna ei iriat khai a nit" an tia. **28** Kha sikah khan Jisuan Pathian Biak inah an risei laiin iring takkan a kheka, "Tum ki nit neh ker thokna hih nin riat titakima? Mahni richama zuang ni mange. Ne tirpu chu mi diktak a nit. Nangmanin chu ani khah re mak chei. **29** Keiman chu ki riat, a zianga zuang rithok neh ama ne itir ki nit sikin" a tia. **30** Khanchu, iman an tum taka, nikhomse, a zoro a la tlung no sikin tuten ton make. **31** Mipui laia itam takkan chu amah an iam taka, "Messia a zuang tikah hi mi hin ai sin neka tam sinrikhel sin thei a tima?" an tia.

Jisua man rangin manmihei an tir

32 Khante, Farisaiheiin Jisua chungchanga mipui riphunna tong an riata, khanchu, thiampu lalhei neh Farisaiheiin Jisua man rangin manmihei an tira. **33** Jisuan an ziangah, "Itoitekah nin laiah la om ki ta, kha nung chu ne tirpu ziangah feng ki ti. **34** Nangmanin ne zong nin ta, ne mu no tin u, ki fena rangah nin fe thei no sikin" a tia. **35** Judahei khah an khatin an risona, "Ei mu thei nona rangah tak tiam ife rang ai ti? Ei mihei omna Grik khopuiah ifen Grikhei zun risei rang ai ti mani? **36** Nangmanin ne zong nin ta ne mu no tin u, ki fena rangah khom hong thei no tin u, ai ti hih ia tina mani?" an tia.

Ringna tuidunghei

37 Khante, Ruaithe tin rang ni nikhua roiinpui takah khan Jisua a dinga, a kheka, "Tukhom a tuirihal ka chu ki ziangah hong sela, in rise. **38** Pathian Thubu'n ai ti angkan tutu ne iam ka chu a sunga rithokin ringna tuidunghei

luang suak a ti" a tia. **39** Jisuan ama iamheiin Rithla an dong rang thu a isir a nit. Kha zoroah khan Rithla ipe la ni make; Jisua khah roiinpuia kaiithoi a la nit no sikin.

Mipui laia inthenna

40 Khanchu, mipui laia thenkan kha thu khah an riatin, "Hi mi hih Zanthla chu a nit nget hite" an tia. **41** Thenkan chu, "Amah hih Messia a nit" an tia. Khannise, thenka nokin chu, "Messia chu Galili rama rithokin hong suak no ni! **42** Pathian Thubu'n ai ti angkan Messia chu Reng Davida richi ning ata. Davida khua Bethlehemah ai suak rang a nit" an tia. **43** Khaangkan Jisua sikin mipui laiah inthenna a om taka. **44** Mi thenkan iman an tuma, khannise, tuten a chungah kut ithum make.

Juda ulianhei iamnona

45 Khante, manmihei khah an hong noka, thiampu lalhei neh Farisaihei khan an ziangah, "Ithom nin hong thui no? itin an ridona. **46** Manmihei khan an sama, "Himpa thusir angkana thu sir reng la om ngai make!" an tia. **47** Khante, Farisaiheiin an ziangah, "Nangni khom ilemin nin iom sa tak mani? **48** Ulianhei neh Farisaihei laia mi khatka luan amah an iam tak iti nin riat ima? **49** Hi mipui Mosia Dan ria nohei hih Pathianin vani ai sam keng" an tia. **50** Farisaihei laia mi khatka Nikodema, matona Jisua neh rimu ranga fepu khah a oma. Ani khan mi danghei ziangah, **51** "Ei danin chu mi tukhom a tongbai suak ei riat ma'n neh a sintho ei mu suak ma'n chu thiamno inchang thei mang me" a tia. **52** Anni khan a ziangah, "Nang khom Galili rama hongim ni nit? Pathian Thubu tep inla, Zanthla Galili rama rithokin suak ngai mak iti riang ni ti" an ti peka.

8

Inrenu an man thu

1 Khante, mi tin mahni in chitah an fe nungin, Jisua chu Oliv tiangah a fea.

2 A tuk zingah Pathian Biak inah a fea. Mihei reng reng khah a kolah an hong, khanchu, a thunga, mipuihei khah an risei taka. **3** Dan inriseipuhei neh Farisaihei khan nupangnu an re lai taka an iman an hong thua, mipui maah an inngira. **4** Jisua ziangah, "Minriseipu, hi nupangnu hih an re lai taka kin iman a nit. **5** Mosia Dan thupekin chu lunga deng that rang a nita, nangman te im ni ti?" an tia. **6** Amah khah ama fiana ranga an iti a nit, a demna rang an mu theina rangin. Khannise, Jisua a khuna, a kuttimin rineng ar ziaka. **7** Khante, idinga tong an irdon angka a thoa an ziangah. "Nin laia sual nei ino takin lungin deng bak rei" a tia. **8** Khanchu, a khun noka, a kuttimin rineng ar zia noka. **9** Khante, a tong khah an riatin chu a ulian indonin khat khatkan an rot riai taka. Khanchu, Jisua khah an makrak taka, nupangnu a dingna ngira ding tian neh khan. **10** Khanchu, Jisua khah a thoa, nupangnu ziangah khan. "Takam an iom tak? Tuten thiamno nang an inchang ino na?" a tia. **11** Nupangnun a sama, "Epu, tuten thiamno nen chang make" a tia. Jisua a ziangah, "A that, kha non chu kei khomin thiamno nang inchang mange. Fen la, isual nok khai no roh" a tia.

Jisua, rammual var

12 Jisua Farisaihei ziangah thu a sir noka, "Keimah hih rammual var ki nit. Tukhom ne zui ka chu ringna var nei an ta, izingah lon tlak no ni" a tia. **13** Farisaihei khan a ziangah, "Mahni thurchi keng ni isir, ni thurchi sir idik make, an tia. **14** Jisua an ziangah, "Mahni thurchi ki isir ni khom se, ki isir hih a dik keng. Keiman chu ki zuang rithokna neh ki fena rang khom ki riat. **15** Nangmanin taksa danin nin ne sel ngaia, keiman chu tute sel mange. **16** Ki lei isel ngan khom om sela, ki selna chu idik a ti; ki khat banga om ni manga. Pa ne tirpu ki ziangah a om sakin. **17** Nin Dan lekhabuah khom 'riatpuitu inika tong chu a dik' iti riziak a nit. **18** Keiman mahni thurchi ke sira. Pa ne tirpu khomin ki thurchi a sir sa ngai" a tia. **19** Anni khan a ziangah, "Takam ni Pa?" an tia. Jisua a sama, "Nangmanin ne re mak chei, ki Pa khom re mak chei. Nin ne iriat ni se chu ki Pa khom re tang nin ti" a tia. **20** Jisua hi thu hih Biak ina tholom bom an siana munah an risei laia ai ti a nit. Tuten ani khah man make; a zoro a tlung no

sikin.

Ki fena rangah fe thei no tin u

21 Khante, Jisuan an ziangah, "Hin om khai no ning, nangmanin ne zong nin ta chu nin sualah thing nin ti. Ki fena rangah fe thei no tin u" a ti noka. **22** Juda ulianheiin, "Ki fena rangah fe thei no tin u' ai ti hih a khatin rithat rang ai ti mani?" an tia. **23** Jisuan a sama an ziangah, "Nangni chu hi rammuala mi nin nit, kei chu chung tianga rithoka zuang ki nit. Hi rammuala rithok nin nita, khannise, kei chu hi rammuala rithok ni mange. **24** Khasikin nin sualah thing nin ti ki ti a nit kha. 'Messia khah ki nit' iti nin ne iam non chu nin sualah thi le leng nin ti" a tia. **25** Anni khan, "Tum ni nit" itin an ridona. Jisuan, "A tira rithoka nangni ki iril a nit. **26** Nin chungrichanah hin isir rang neh idem rang itamka ki nei. I khom ni se, ne tirpu chu mi diktak a nita; a zianga ki riat ka rammual ki iril ngai a nit" itin a sama. **27** Jisuan Pa thurchi an ziangah a isir a nit iti re make. **28** Khasikin an ziangah, "Miriam Naipa hih nin ikhai tikah ani khah keimah ki nit iti neh keima richamin ite tho manga. Pa he ne be ka ki isir a nit iti re sang nin ti. **29** Ne tirpu chu ki ziangah a om, ne marak make, a lungdo ki sin mai sikin" a tia. **30** Kha thu Jisuan a isir khah mi tam takkan an riata, an iam taka.

Zalen mi neh suak

31 Khanchu, Jisuan ama iamhei ziangah khan, "Ki he be hih nin zomin chu ki koilom diktak ning nin ti; **32** thutak riang nin ta, thutak khan suak nangnin zok a ti" a tia. **33** Anni khan a ziangah, "Abrahama richi keng kin init, tute suakah la omang unge. 'Suak nangnin zok a ti' ni ti hih i ni tina mani?" an tia. **34** Jisuan an ziangah, "Thudik tak nangni ke ril, tukhom sual isin chu sual suak a nit. **35** Suak chu kumkhuan inah om ngai mak; naipa chu kumkhuan a om ngai. **36** Khasikin Naipan suak nangni an zok bangin keng nin izok titak rang. **37** Abrahama richi nin nit iti ki riat. Khannise, nangmanin ne that nin itum a nit ki tong nin iham no sikin. **38** Keiman ki

isir hih ki Pa ne inmu a nit. nangni khom nin pa nangni ril lamin nin isir ngai" a tia. **39** Anni khan, "Kin pa chu Abrahamama a nit" an tia. Jisuan an ziangah. "Abrahamama nai diktak nin init ni se chu a lei sin lam angka nin isin rang a nit. **40** Ki sintho takhei reng reng chu Pathian zianga thudik ki riat nangni ril hih a nit; khannise, atunah hin ne that nin itum tian a anit. Abrahaman chu hingkan tho ngai make. **41** Nangmanin chu nin pa lei itho ngai khah nin itho a nit" a tia. Anni khan, "Pathian bang keng kin Pa neisun, keini hih a nai diktakhei kin nit" itin an sama. **42** Jisuan an ziangah, "Pathian nin Pa a nit titakin te, lung nin ne thlung rang a nit; Pathian zianga rithoka zuang ki nit sikin atunah hin nin laiah ki om a nit. Keima richama zuang ni manga, ne tirpu richama zuang keng ki nit. **43** Ithom ki isir hih nin riat thei tlak no? Ki thusir hih nin lungriolah nin ngaitua no sika a nit. **44** Nin pa Diabola naihei nin nita, nin pa lungdo sin nin inuam a nit. Ani khah a tir ata mi that ngai a nit, thudik tiang khom tang ngai make, dikna reng a nei no sikin. Milak a tho'n ama isua a nit ngai, milakpa a nit sikin; milakhei tinreng pa khom a nit sa. **45** Khannise, kei chu thutak keng ki isir ngai, kha sik takah khan nin iiam ngai ino a nit. **46** Nin laiah tum sual lama thiamno nen chang thei ranga? Thutak ke sir khomin ithom nin iam no? **47** Pathian zianga rithoka zuangin chu Pathian thu a iham ngaia. Nikhomse, nangni chu Pathian zianga rithoka zuang nin nit no sikin a thu khom nin iham ino a nit.

Jisua neh Abrahamama

48 Khante, anni khan a ziangah, "Samari mi, ramrili iman ni nit kin iti khah idik makima?" an tia. **49** Jisuan an ziangah, "Ramrili iman ni mange. Ki Pa ki choiinrisanga nangmanin nin ne iesel a nit hi. **50** Mahni thatna izong ni mange; a zongpu neh a relpu mi khatka aom keng. **51** Thutak nangni ki iril a nit: tukhom ki thu zom chu thi tlak no ni" a tia. **52** Anni khan a ziangah, "Ramrili iman ni nit iti kin riatinfel tak! Abrahamama a thi tak, zanthlahei khom an thi zoi tak, khankhoma nangman chu 'Ki thu zom chu thi tlak no ni' ni tia. **53** Kin pa Abrahamama nekan ni lian ual mani? Ani khom a thi tak, zanthlahei khom an thi zoi tak; a tukhokinim ni irbe?" an tia. **54** Jisuan an

ziangah, "Mahnin choiinrisangna zong inlang, kha choiinrisangna kha chu ite ni no ni. Kin Pathian nin iti, ki Pa khah ne choiinrisangpu a nit. **55** Nangmanin chu amah re mak chei, keiman chu ki riat a nit. Amah re mang ki tin chu nangmani angkan milak ki nit rang a nit. Nikhomse, amah chu ki riata a thu khom ki zom ngaia. **56** Nin Pa Abrahaman ki zuang a mu rangah khan a raiafan oka, khaangkan, a mu ngeia, a lom tak tak" a tia. **57** Anni khan a ziangah, "Kum somringa lua la kai loi chen te, Abrahamana ni mu ma?" an tia. **58** Jisuan an ziangah, "Thudik keng nangni ki iril. Abrahaman zir ma khomin ki om" itin a sama. **59** Kha nung chu a dengna rang lung an ruta, nikhomse, Jisua ar bika, Pathian Biak in ata khah a suak taka.

9

A suak ata mitdel Jisuan an dam

1 Khante, Jisuan fe malamin a suak ata mitdel a mua. **2** A koilomheiin a ziangah, "Minriseipu, hi mi hih tu soal sika mitdela a inzir mani? Ama soal sikam, a nu neh pa soal sikam?" itin an ridona. **3** Jisuan an ziangah, "Hi a mitdelna hih ama soal sika ni make, a nu neh pa soal sika khom ni ual make; Pathian sintho a chung a lang theina ranga a nit. **4** Sun a nit laiin ne tirpu sin ei tho rang a nit; zan a zing rang tak keng, kha tikin chu tuten sin tho thei khai no ni. **5** Rammualah ki om sung ka chu rammual invarpu ki nit" a tia. **6** Amah khah a ti zoiin chu rinengah a chila, a chilin ibuan a siama; khanchu, ibuan khah a mitah a not peka, **7** a ziangah, "Fen la, Siloam dilah ni mai va phi roh" a tia. (Siloam chu 'Itir' itina a nit). Khaangkan, kha mi khah a fea, a mai a va phia, mit ivarin a hong kir nok taka. **8** Khante, a bungtualbomhei neh kut a do lai lei imu tak ngai mihei khan, "Hi mi hih a thunga kut ido ngai khah ni makima?" an tia. **9** Mi thenkan chu, "Hi mi hih a nit" an tia. Mi thenka nokin chu, "Hi mi hih ni make, ar angpui keng" an tia. Ani khan, "Kha mi khah ki nit" a tia. **10** Khante, anni khan a ziangah, "Ingkam ni mit a hong ivar nok? itin an ridona. **11** Ani khan an ziangah, "Mi khatka, Jisua an iti khan ibuan a

siam a ki mit a nota, khanchu, 'Siloam dilah fen la, ni mai va phi roh' a ne tia. Khaangkan, ki fea, ki mai ki phi zoi kaneh ki mit ai var zel a nit" itin a sama. **12** Anni khan, "Kha mi khah takam ai om?" itin an ridona. Ani khan, "Re mange" itin a sama.

Farisaiheiin mitdelpa dam tlia an sui

13 Kha nung chu masa a amit idelpa khah Farisaihei ziangah an thui taka.

14 Jisuan ibuan a siama an dam ni khah Sabbathni a anit. **15** Khaangkan, Farisaiheiin mitvarna a mu tlia khah an ridon noka. Ani khan an ziangah, "Ki mitah ibuan a siaa, ki mai ki phia, ki mit a hong ivar zel a nit" itin a rila. **16** Farisai thenkan chu, "Hi sin ithopu hih Pathian zianga zuang rithok ni thei no ni, Sabbathni dan a zom no sikin" an tia. Thenka nokin chu, "Ingkanim mi sualin hingkana sinrikhel hih a sin thei ranga?" an tia. Kha nung chu an laiah inthenna a om taka. **17** Khasikin Farisaiheiin kha mi khah voika an ridon noka a ziangah, "Mitvarna a nen nei' ni tia, khate, nangman te tum a nit ni ti?" an tia. Ani khan an ziangah, "Zanthla a nit" itin a sama. **18** Khannise, Juda ulianhei khan kha mi khah mitdelan zir a nita, atun chu mitvarna ai mu tak a nit iti iam thei mak sikin a nu neh pahei an koia, an ziangah, **19** "Hi mi hih nin naipa a suak ata mitdel nin iti khah ai nit mani? Ingkam atunah hin a mit a hong ivar nok tak?" itin an ridona. **20** Khante, a nu neh pan, "Hi mi hih kin naipa a nit, a suak ata mitdel a nit iti khom kin riat. **21** Khannise, ingkam a mit a hong ivar neh tum an dam iti chu re mang unge. Amah ridon rei, ulian a nit tak; ama thurchi chu aman isir rise!" itin an sama. **22** A nu neh pa khan Judahei an ti sikin khangkan an isam a nit. Judahei khan maton ata tukhomin Jisua khah Messia a nit itin a iamin chu inkhom in ata umisua rang itia an lei ithluk thlam a nit. **23** Kha sik takah khan keng a nu neh pan, "Ulian a nit tak, amah ridon rei" an iti. **24** Khante, mitdel khah a voi niknan an koi noka, a ziangah, "Pathian makungah thudik iril rangin inkungna nei roh! Nang indampu khah mi soal a nit iti kin riat" an tia. **25** Ani khan an ziangah, "Mi soal a nit neh nitno ite re mange. Ki riat chu: Mitdel ki nita, atun chu ki mu thei tak" itin a sama. **26** Anni khan a ziangah, "Im nang ai tho pek? Ingkam ni mitdelna a

indam?" itin an ridona. **27** Khante, ani khan an ziangah, "Machin khom nangni ke ril tak, khan, re nuamak chei. Ithom a ria nin inuam nok tak? Nangni khom ama koilom ichang nin inuam mani?" itin a sama. **28** Khanchu, anni khan an rifaia, "Nangmah ama koilom ni nita, keini chu Mosia koilom keng kin init. **29** Mosia ziangah Pathian a lei tong iti kin riat. Khannise, hi mi hih chu taka rithok mani khom re mang unge!" an tia. **30** Kha mi khan an ziangah, "Khah tak khah ar khelna a nit! Nangni chu ar thokna khom re mak cheia, keimah chu ki mit a ne invar pek a nit! **31** Pathianin mi soal tong ringai ngai make iti ei riat; nikhomse, ama ngikhei neh a lungdo sinhei tong chu ar ngai ngai. **32** Rammual insiang ata tuten mitdel isaia suak mit an var pek iti la re ngai make. **33** Hi mi hih Pathian ziang ata zuang ni no se chu hingkana sin hih tho thei no ni" itin a sama. **34** Anni khan a ziangah, "Nangmah سوالان zir neh seilian hin nen risei ni tum mani?" itin an sama. Kha nung chu inkhom in ata an umisua taka.

Rithla mitdelna

35 Jisuan kha mi khah umisua a nit tak iti a riatin chu a zong suaka, a ziangah, "Miriam Naipa hih ni iamim?" itin ar dona. **36** Ani khan, "Epu, tum ai nit ne ril roh, ki iam theina rangin" a tia. **37** Jisuan a ziangah, "Ani khah ni mu taka, atuna nang isonpu hih amah a nit" a tia. **38** Ani khan, "Pumapa, ki iam" a tia. Jisua kebulah rikhuk a dila. **39** Jisuan a ziangah, "Hi rammualah hin roi irel ranga zuang ki nit, mitdelhei mit a varna rang neh mitivarhei mit a delna rangin" a tia. **40** Khante, Farisai thenka a kola omhei khan kha tong khah an riata a ziangah, "Keini khom hih mitdel kin init sa mani?" itin an ridona. **41** Jisuan an ziangah, "Mitdel nin init ni sela chu soal nei no tin u; khannise, 'kin mu thei' nin ti sikin nin soal ai om mai a nit."

10

Berapu tongrikhek

1 "Thudik tak nangni ke ril: mi tukhom bera rikul kotbaiah lut loaia, a dang tianga luaia lut chu inru neh mi that ngai a nit. **2** Tukhom kotbaia lut chu berapu a nit. **3** Kotbai ingakpu khan kotbai a ong peka, beraheiin a roi an riata. a berahei chu an riming chitin a koia a thui isua ngai. **4** A thui isua zoiin chu ma a sak peka, beraheiin amah an zui ngai, a roi an riat sikin. **5** Mi dang chu tute zui no ni, izui nekan itlan pek pat an ti; a roi an riat no sikin" a tia. **6** Jisuan hi tongrikhek hih a sir peka, nikhomse, im a omzia rethei make.

Jisua, Berapu tha

7 Jisuan an ziangah. "Keimah hih bera kotbai ki nit. **8** Ki matona lei ihonghei reng reng kha chu inru neh mi that ngai an nita, berahei khomin an thu zom make. **9** Keimah hih kotbai ki nit. Tukhom keimaa lut chu inringin om a ti; lut a ta, suak a ta, ifah rang mu sang a ti. **10** inru chu iru rang neh mi that rang neh iseh rang bangin keng ai hong ngai. Kei chu ringna nin neina ranga, itam takka nin neina ranga zuang ki nit. **11** Keimah hih berapu tha. a berahei ta ranga a ringna phal nuam ki nit. **12** Rilo mi, berapu dik ni no, berahei khom a ta ni no'n chu inia hong a mu kaneh chu berahei a makraka, a tlan pata, inia khan berahei a sea a thekindar chit ngai. **13** Rilo mi a nita, berahei a uksak no sikin a itlan pat ngai a nit. **14-15** Keimah hih berapu tha ki nit. Pan a ne riata kei khomin Pa ki riat angkan ki berahei chu ki riata anni khomin an ne iriat a nit. An ta ranga thi khom ki huam a nit. **16** Hi bera rikula la om ino bera dang khom ki la nei sa. Khahei khah la hong thui sang ki ta, bera lom khatkan la om an ti, berapu khatka neh. **17** "Hi sikah hin Pan lung a ne ithlung a nit, ila nok ranga ki ringna ki pek rang sikin. **18** Tuten ki ringna hin ne la pek thei no ni. Keima richamin ki pek lem rang a nit. A pe thei ki nit, a la nok thei khom ki nit. Amah hih itho rangin ki Pan a ne ibe a nit" a tia. **19** Kha thu sikah khan mipui laiah inthenna a om noka. **20** Mi itam takkan, "Ramrili imana anvet keng! Ithom a tong nin irngai pek?" an tia. **21** Mi thenkan chu, "Ramrili imanin chu hingkan tong thei no ni! Ingkam ramrilin mitdel mit an var pek thei ranga?" an tia.

Jisua ihengin a om

22 Khante, phalbi zoro a nita, Jerusalema Ripeklet Ruaithe lai tak a nita.
23 Jisua khah Pathian Biak ina Solomona thapukah khan ar long ar longa.
24 Khanchu, mipuihei a kolah an hong ribuma, a ziangah, "Itenam lungokrikaiin ni ne isia rang? Messia ni nit mani a felin ne ril roh" an tia. **25** Jisuan an ziangah, "Nangni ke ril tak khate, khannise, ne iam mak chei. Ki Pa richamneinaa sin ki thohei hin ki thurchi nangni a inriat a nit. **26** Khannise, iam mak chei ki bera nin nit no sikin. **27** Ki beraheiin chu ki roi an riat ngai; kei khomin anni khah ki riat, anni khomin an ne zui ngai. **28** An ziangah kumtluang ringna ki peka, kumkhuakan thi tlak khai no ni. Ki kuta rithokin tuten ne sut thei khai no ni. **29** Anmani ne pepu ki Pa chu mi tin tin neka roiinpui a nit, tuten Pa rithokin la thei no ni. **30** Pa neh keimah chu pumka kin nit" itin a sama. **31** Khanchu, mipuiheiin a dengna rang lung an rut noka. **32** Jisuan an ziangah, "Pan isin ranga a ne ipek cin itha itam takka nin mitmuah ki sin taka, a i khok sikah khanim lunga ne deng nin itum hi?" a tia. **33** Anni khan a ziangah, "Sin itha sikin nang ideng nuamang unga, Pathian riming ne sirinsiat sik neh miriam ini chakka Pathiana ner be sikin a nit" an tia. **34** Jisuan an ziangah, "Nin Dan lekhabuah 'Pathianhei nin nit' iti riziak ni makima? **35** Ei riat angkan Pathian Thubu'n ai ti ka chu kumkhuakan a idik ngai a nit, Pathianin a tong a thlunnahei khom khah pathianhei ai ti a nit. **36** Keimah vang chu Pan a ner thlanga rammualah a ne zuang itir a nit. Ingkam Pathian Naipa ki nit ki ti sikah hin Pathian ne sirinsiat nin ne iti hi? **37** Ki Pan isin ranga a ne inuam ki sin a nit non chu ne iam no rei. **38** Khannisela, ki sin a nitin chu keimah nin ne iam no khoma, ki sinthohei ilua hih iam rei ba; Pa keimaah a om iti neh kei khom Paah ki om iti nin riatinfel theina rangin" a tia. **39** Kha nung chu Jisua iman an tum noka, khannise, an kuta rithokin a zok pat taka. **40** Khante, Jisua khah Jordan vadung ralah, matona Johanan mi a baptisna ngai mun tiangah khan a fea, kha munah khan a om mai taka. **41** Mi tam takka a ziangah an hong, "Johanan ite sinrikhel sin make, nikhomse, himpa chungchang thu a lei isirhei reng reng kha chu a idik a nit" an tia. **42** Khanchu, mi itam takkan amah an iam taka.

Lazara thi thurchi

1 Mi khatka ar ming Lazara Bethani khuaa om khah dam maka. Bethani khah Man neh a unainu Marthi omna khua a nit. **2** Hi Mari hih Pumapa ke siriak namhoi inota, a sama a ke ru peknu khah a nita, a damino Lazara hih a tapa a nit). **3** A farheiin Jisua ziangah, "Pumapa, ni mai lungthlung dam make" itin tong an richaa. **4** Jisuan a riatin, "Hi Lazara natna hih thina rang ni make; Pathian roiinpuina rang a nit, hi sikah hin Pathian Naipa khom roiinpuuin a lai om rang a nit" a tia. **5** Jisuan Marthi neh a uliannu neh Lazara hei khah lung a thlung oka. **6** Khankhoma damno thu khah a riat nungin a omna khuah khan sun nika a la om noka. **7** Khanchu, a koilomhei ziangah, "Judai ramah fe nok tang ei ti" a tia. **8** A koilomheiin a ziangah. "Minriseipu, nikah le le miheiin lungin nang ideng rang an ti kha, khankhoma la fe nok ni tum mani?" an tia. **9** Jisuan an ziangah. "Sunkan darkar somleinika ai om ni makima? Khasikin mi tukhomin sunkhovarah a lengin chu ivai ngai mak, hi rammual hih a mu sikin. **10** Khannise. zaninthimah a lengin chu a vai ngai. ivar a nei no sikin" a tia a sama. **11** Jisuan kha tong khah a ti zoi kaneh chu. "Ei malpa Lazara chu a in tak. nikhomse. ama thoi rangin ki fe rang a nit" a tia. **12** Koilomheiin a ziangah. "Pumapa. a in takin chu dam nok tang a ti" itin an sama. **13** Jisuan chu Lazara a thi tak a tina a nit. khannise. annin chu a in pai a tina an ison a nit. **14** Khasikin, Jisuan ifel takkan an ziangah a sir peka. "Lazara a thi tak, **15** nikhomse. a ziangah ki om ino khah nangmani rang sikin ki lom a nit. nin iam theina rangin. Tho a ziangah feng ei ti u" a tia. **16** Thoma (Phira an iti) khan a koilom champuihei ziangah, "Tho Minriseipu ziangah ei rengkan feng ei ta, a thinah thing ei ti u" a tia.

Jisua, Thoinokna neh Ringna

17 Jisua a hong tlungin chu Lazara an phumna khah sun lika a nit tak iti a riata. **18** Bethani khah Jerusalema rithokin kilomitar ithumka neka nai a

nit. **19** Khasikin, Judai rama mi itam takka Mari neh Marthi an tapa thi chungchanga thlangam isak rangin an hong. **20** Marthin Jisua a hong iti a riat kaneh chu amah neh rimu rangin a suaka, Mari chu in sungah a lei om tiana. **21** Marthin Jisua ziangah, "Pumapa, hin ni om ni se chu ki tapa hih thi no ni! **22** Nikhomse, atun khom Pathian ziangah ni ni ka chu nang peng a ti iti ki riat" a tia. **23** Jisuan a ziangah, "Ni tapa thoinok a ti" a tia. **24** Ani khan. "Sun nungkhonah chu thoinok a ti ti ki riat" a tia. **25** Jisuan a ziangah. "Keimah hih thoinokna neh ringna ki nit. Tukhom ne iam chu thi man sela ring mai a ti; **26** tukhom a ringa keimah ne iam chu thi tlak no ni. Hi tong hih ni iamim?" a tia. **27** Ani khan a ziangah. "O, Pumapa, ki iam, Nangmah hih Messia, Pathian Naipa, rammuala zuang rangpu khah ni nit iti ki iam titak" a tia.

Jisua a tap

28 Marthiin kha tong khah a ti zoiin chu a uliannu Mari a khatin a koia a ziangah, "Minriseipu hin a oma, nang a zong" a tia. **29** Marin a riat kaneh rimotin a thoia, amah neh rimu rangin a fe a. **30** ("Jisua khah khua la hong tlung make, Marthi neh an ritongna munah khan a la om mai.) **31** In sunga Mari thlangam isaka a ompui mipuihei khan Mari rimotin a thoia, a suak iti an mu'n chu itap ranga ithlana fe an soha, an zuia. **32** Marin Jisua omna a hong tlunga, a mu kaneh chu a kebulah a boka, a ziangah, "Pumapa, hin ni om ni se chu ki tapa hih thi no ni!" a tia. **33** Jisuan Mari tap neh a hong izui mipuihei itap khah a mu'n lungrilin ar niaka, a lung an siata, **34** "Ani khah takam nin iphum?" a tia. Ani khan, "Pumapa, hong inla, en roh" itin an sama. **35** Jisua a tap tak. **36** Mipuiheiin, "En ta u, ingkana lung ai thlung rai takim?" an tia. **37** Khannisela, thenkan chu, "Mitdelpa khah mitvarna ai pek ni makima? Lazara khom hih a inthi no thei ino mani?" an tia.

Lazara inring nok a nit

38 Khante, Jisua lungrilin ar niak noka, ithlanah a fe a, ithlan khah ipuk, lunga sing a nit. **39** Jisuan. "Lung hih thinpai rei" a tia. A thipu farnu

Marthin a ziangah, "Pumapa, a nam se tang a ti, an phumna sun lika reng a nit tak!" a tia. **40** Jisuan a ziangah, "Ni iamin chu Pathian roiinpuina mung ni ti nang ti mangima?" a tia. **41** Khanchu, lung khah an thinpai taka. Khante, Jisua a tanga, "Epa, ki tong ner ngai sikin ni chungah ki lom. **42** Ki tong ner ngai mai ngai iti ki riat, nikhomse, amah hih chu hi mipuihei hin nangma ne itir ki nit iti an iam theina rangin nang ki ti a nit" a tia. **43** Amah khah a ti zoiin chu, roi iring takkan a kheka, "Lazar, hong suak roh!" a tia. **44** Mithi khah a kut a ke ithlan puana rituam tiankan, a mai khom puana rituam tiankan a hong suak taka. Jisuan an ziangah, "Sut unla, infe rei" a tia.

Jisua ithat an tumna

45 Mi tam takka Mari ina honghei khan Jisua sintho khah an mua, amah an iam zel tak. **46** Khannise, mi thenka an kir noka, Farisaihei ziangah Jisua sintho khah an va sir peka. **47** Khasikin Farisaihei neh thiampu lalhei neh roirelpuhei an rimua, "Ingkam ei tho rang tak? Himpa hin sinrikhel ai sinhei hih en ta u! **48** Hingka hin ei infe mai lakina, mi tinin hong iam an ta, khanchu, Rom ulianhei zuang an ta, ei Biak in neh ei nam an ne isiat pek rang keng!" an tia. **49** Khante, an laia mi khatka, ar ming Kaiafa, kha kuma Thiampu Laltak khan an ziangah, "Nin intlok baka! **50** Mi pumpui ithia, a nam pumpui rimang vang nekan chu mi khatka thi hih a that iti nin iriat ino mani?" a tia. **51** A dikin chu ama khat lungintong ai ti ni maka, kha kuma Thiampu Laltak a nit sikin Jisua khah Juda mipui rithula a thi rang khah a lei irillok a nit. **52** Khante, anmani rang bang ni loiin, Pathian mi thekindara omhei, lom khatka a tel theina rang khomin a nit sa. **53** Kha nikhua rithokin chu Juda ulianheiin Jisua an that rang dan an ngaitua taka. **54** Jisua khom a langin chu Judai ramah leng khai maka, ramchar kola khua khatka ar ming Efraim an itiah khan a fea, a koilomhei neh an om mai taka. **55** Khante. Kalkan Ruaithe a nai tak sikin mi itam takka rama rithokin rithiar rangin Jerusalemah an hang fea. **56** Khante, Jisua an zonga, Biak inah, an ribum laiin an risona, "Ingkam nin tung Ruaitenah hong a ti ma? **57** Thiampu lalhei neh Farisaiheiin amah an man theina rangin

tukhomin a omna an riatin chu an isir rang a nit iti thu an ipek tak keng a nita" an tia.

12

Bethaniah Jisua siriak inotin a om

1 Khante, Kalkan Ruaithena rang sun rukka matonah Jisuan thina rithoka ai kaiithoi Lazara omna Bethani khuah a fea. **2** Ama ta rangin kholoi bu nekna an siama, Marthi khah bu, an, isem a changa, Lazara chu Jisua bukheng iotpuihei laia khatka a nit. **3** Khante, Marin litar rizatka nard siriak namhoi man ilutak a hong choia, Jisua ke a nota, a samin a ke a ruk peka; khanchu, kha siriak namhoi khan in pumpui khah a sip zap taka. **4** Khante, Juda Iskariota, Jisua koilom khatkaan man rangpu khan, **5** "Hi siriak namhoi hih ithom duli riza thumka zuarin inrianghei ziangah ipe a nit no?" a tia. **6** Kha tong khah inrianghei a uksak sika ai ti ni make, inru a nit sika a nit. Kha mi khan sum kok a kola, a sunga sum khah ama ta rangin ai lak ngai a nit. **7** Khannise, Jisuan a ziangah, "Rikok no roh, ai nei hih iphuma ki om nia rangin re rise. **8** Inrianghei chu nin zianga om mai rang an nita, kei chu nin ziangah om mai no ninge" a tia.

Lazara ithat an tum thu

9 Khante, mi tam takkan Bethani khuah Jisua a om iti an riatin Jisua mu rangin neh Lazara, Jisuan thina rithoka ai kaiithoipu mu sa rangin an fea. **10** Khanchu, thiampu lalhei khan Lazara khom ithat an tum a, **11** ama sikin Juda itam takkan anmani hengin Jisua an iam tak sikin.

Jerusalema Jisua inlal takkan a lut thu

12 A tukah chu, ruaithenaa hong mipui itam takkan Jisua Jerusalemah hong a ti ti an riatin, **13** itum ibanhei an choia, ama don rangin an fea, "Pathian chu inpakin om rise! Pumapa rilinga zuang chu Pathianin thatvur rise! Pathianin Israel Reng thatvur rise!" itin an ipaia. **14** Jisuan Sakuartung

khatka a mua, a chungah a chuang a, Pathian Thubu'n, **15** "Ti no roh, Zaion khopui! Ni reng khah sakuartung te chungah chuangin ai hong a nit" ai ti angka khan. **16** Kha thu khah a phutah chu a koilomheiin re thei make; nikhomse, Jisua choiinrisanga a om zoi tenan chu Pathian Thubu'n ama chungrichan a lei irziak a nit iti neh a chungah khangka khan an lei tho ti an riat tak. **17** Khante, Jisuan Lazara ithlan ata a koi isuaa, thina rithoka a kaiithoi laia mipui iomhei khan a thurchi an isir thiai mai taka. **18** Kha sinrikhel khah an riat sikin mipuiheiin an lei idon a nit. **19** Farisaihei khan, "En ta u, ite chang khai mang me! En rei, rammual pumpuiin amah keng an izui tak hi! an tia.

Grik thenkan Jisua an zong

20 Khante, ruaithenaa Pathian chubai iuna Jerusalema hang ifehei laiah khan Grik thenka an oma. **21** Khahei khah Filipa (Galili rama Bethsaida kho mi) ziangah an fea, "Epu, Jisua mu kin nuam" an tia. **22** Filipan Andria a va rila, khanchu an ruakan an fea, Jisua an va ril a. **23** Khante, Jisuan an ziangah, "Miriam Naipa choiinrisanga a om zoro a tlung tak. **24** Thudik tak nangni ke ril: Far mai rinengah a tlaka, a thi non chu, ar malin a om tian ngai; a thi bangin keng itamkan a ira ngai. **25** Tukhom a ringna inpam kan ichan a ta, tukhom a ringna'n tlom kan kumtluang ringna nei mai a ti. **26** Tukhom ki sin itho nuam kan chu ne zui nget rise, ki sin ithopu chu ki omnah a om sa theina rangin. Tukhom ki sin itho chu ki Pan choiinrisang a ti.

Jisuan a thi rang thurchi a sir

27 "Atunah hin ke lung a kang, im ki ti rang tak? 'Epa, hi zoro hih ki chungah ne thlun pek no roh' ki ti rang mani? Khannise, hi duk ituang rang piala zuang ki nit. **28** Epa, ner ming choiinrisang roh!" a tia. Khanchu, rivana rithokin roi a zuang suaka, "Ki choiinrisang tak, la choiinrisang nok ki ti" a tia. **29** Khante, mipui a kola dinghei khan, amah khah an riata, an laia thenkan, "Khuari a nit" an tia, thenka nokin chu, "Vantirtonin a ison

keng" an tia. **30** Jisuan an ziangah, "Kha roi khah keima ta ranga zuang isuak ni maka, nangmani ta ranga keng. **31** Atun hih hi rammual irelin a om zoro a nit; hi rammual roirelpu khom hih atun ipaiisua ning a ti. **32** Khante, rinenga rithokin ikhaiin ki om tikin chu mi tin ki tiang rikuai ki ti" a tia, **33** (Kha tong khah a thi rang tlia riattheina ranga a isir a nit). **34** Mipuiheiin a ziangah, "Kin Dan lekhabin Messia chu kumkhuantluangkan ring mai a ti ti a ne ril. Ingkam nangman chu 'Miriam Naipa hih ikhaiin om a ti' ni ti thei? Hi Miriam Naipa hih tum ai nit?" an tia an sama. **35** Jisuan an ziangah, "Ivar hih itoi tekah chu nin laiah la om hing a ti. Ivar nin nei laiin leng rei, izingin nangni a de nona rangin; tukhom izinga leng chu a fena re ngai make. **36** Ivar nin nei laiah hin ivar hih iam ta rei, ivar naihei nin nit theina rangin" a tia. Kha tong khah a ti zoiin chu a rota, an mu thei nona rangah ar bik taka.

Mipuihei iam no zia

37 An mitmuah sinrikhel itam takka a sin nung khomin mipuiheiin amah iam make, **38** Zanthla Isaian, "Pumapa, kin thusir tum a iama? Tu chungam Pumapan ar tha a inlang? itia a lei isir khah a hong idik theina rangin. **39** Hi sika an iiam thei ino a nit Isaian **40** "Pathianin an mit an del peka an ilung khom an cho pek sa, An mitin a mu nona rang neh an ilung khomin a riat thei nona rangin. Kha non chu an hong kir nok duaiin Keiman ki lei indam loiin" itia a lei isir sikah khan. **41** Isaian Jisua roiinpuizia a mu sik neh a thurchi a sir sikin kha tong khah ai ti a nit. **42** Khannise. Juda ulian itam takkan Jisua an iam tak; nikhomse, Farisaihei sikin isir inpuang make, kha non chu inkhom in ata umisua an inith rang a nit. **43** Pathian ihamna nekan miriam ihamna an irzuk ual a nit.

Jisua tongbai roirelpu a nittlia

44 Jisuan roi iring takkan. "Tukhom ne iam chu keima ne iam ni make, ne tirpu iam an nit lem. **45** Tukhom ne mu chu ne tirpu mu a nit. **46** Rammualah hin ivar angkaan ki zuang a nit, tukhom ne iam chu izingah an

om nona rangin. **47** Tukhom ki thusir irian zom no khom se, keiman chu rel no ninge. Rammual irel ranga zuang ni manga, rammual inring ranga zuang keng ki nit. **48** Tukhom keimah ne henga, ki thusir ipomino chu ama rel rang khatka a nei. Thu ki isir khah sun nungkhonah chu ama roirelpu la ning a ti. **49** Keima iphuatotin ite isir ngai manga, ki Pa ne tirpun ki ti rang neh ke sir rang chu thu a ne ipek ngai a nit. **50** Ama thupek chu kumtluang ringna a nit iti ki riat. Khasikin thu ki isirhei hih Pa ne ril lam angka takin ki isir a nit" a tia.

13

Jisuan a koilomhei ker ar suk

1 Khante, Kalkan Ruaithe rang ni a hong nit taka. Jisuan hi rammual hih ima'n Pa ziangah a fe zoro a tlung tak iti a riata. Ama ta, hi rammuala om lung ai thlung ngaihei khah a mong idenin lung a thlung maia. **2** Jisua neh a koilomhei zanbu an neka. Khante, Soitanan, Simon Iskariota naipa Juda, lungrilah Jisua inman rangin ngaituana a lei innei thlam taka. **3** Jisuan Pan richamneina murdi a pek iti neh Pathian zianga rithoka zuang a nita, Pathian zianga fe nok rang a nit iti a riata. **4** Khasikin bukheng kung ata a thoia, a puanhei a siaa, rirukna puan a vonga. **5** Kha nung chu taborah tui a sunga, a koilomhei ke ar suka, rirukna puan ai vongah khan a ruk thiaia. **6** Khante, Simon Petera ziangah a fea, ani khan, "Pumapa, nangman ki ke ni irsuk rangim?" a tia. **7** Jisuan a ziangah, "Ki sintho hih atun chu la re mak che; nikhomse, nakanah chu la riang ni ti" a tia. **8** Peteran a ziangah, "Nangman chu tik lai khomin ki ke risu tlak no tine!" a tia. Jisuan a ziangah, "Ni ke ker suk non chu ki koilom ni khai no tine" a tia. **9** Simon Peteran a ziangah, "Pumapa, kha non chu ki ke bang risu non la, ki kut neh ki lu khom risu sa roh!" a tia. **10** Jisuan a ziangah, "Tukhom tuisil tak chu a fai tak a nit, a ke ti no chu ar suk nok nang khai make. Nin laia mi khatka ti no chu nin rengkan nin fai liai tak. **11** (Jisuan an man rangpu khah a riat sikin nin laia mi khatka ti no chu nin rengkan nin fai ai ti a nit). **12** Khante, an ke ar suk pek zoiin chu a puan a sila, bukheng a pan noka, an

ziangah, "Nin chung a ki sintho hih nin riat theim? **13** Nangmanin Minriseipu neh Pumapa nin ne tia, nin iti'n dik a nit; ki nit nget sikin. **14** Keimah nin Pumapa neh Minriseipu lua manin nin ke ki irsuk a nit, khaangkan, nangni khom nin ke nin risuk risak rang a nit. **15** Nin chung a ki tho angka hin nangni khomin nin tho theina rangin nangni ki inmu a nit. **16** Thudik tak nangni ke ril: suak hih a pu nekan lian maka, tirtan khom a tirpu nekan lian make. **17** Atun chu kha thudik khah nin riat tak, nin zomin chu lom tak tak nin ti. **18** Nin rengka thu isir mange; ki irthlanghei chu keiman ki riat. Nikhomse, Pathian Thubu'n, 'Ki bu nepu khan a ne doi tak' ai ti khah a hong idik nget ai nang a nit. **19** Amah hih a hong tlung ma'n nangni ki lei iril a nit, a hong tlung tikah khom 'Ani khah keimah ki nit' iti nin ne iam theina rangin. **20** Thudik tak nangni ke ril: tukhom ki mi tir iham chu keima ne ham a nit; tukhom ne ham chu ne tirpu ham a nit" a tia.

Jisuan an man rangpu a rillok

21 Jisuan kha tong khah a sir zoiin chu a lung duk an tonga, "Thudik tak nangni ke ril: nin laia mi khatkan nen man a ti" itin an puanga. **22** Koilomhei khan ai ti bik an riat no sikin an rien risaka. **23** Koilom laia mi Jisuan lung ai thlungah khah Jisua kolah a thunga. **24** Khampa ziangah khan Simon Peteran, "Tukhok takim ai ti ridon ta" itin zaizirin a sona. **25** Khanchu, ani khah Jisua tiang a var thina, "Pumapa, tu takim ai nit?" itin ar dona. **26** Jisuan a ziangah, "Ibai lek ichiang ki ta, ki pek tak khah ning a ti" a tia a sama. Khanchu, ibai lek a laka, a chiaa, Simon Iskariota naipa Juda, ziangah a peka. **27** Judan ibai lek khah a lak kaneh chu a sungah Soitana a lut zel taka. Kha nung chu Jisuan a ziangah, "Ni tho rang hih tho vak vak roh" a ti peka. **28** Khan, docham rikhilhei laia tuten ithom khangkana Jisuan ai ti pek re make. **29** Koilom thenkan chu, "Juda khan sum a koi sikin, Jisuan 'Ruaithea mang rang thil ei irsam richo roh' ai ti mani, anitnole, 'inrianghei i tika pe roh' ai ti pek mani an sona.

Thupek Ithar

30 Khanchu, Juda khan ibai khah a laka, a rot zel taka, kha zoro khah zan a nit. **31** Juda a rot zoiin chu Jisuan an ziangah, "Atun chu Miriam Naipa choiinrisangin a om tak, ama sikin Pathian khom choiinrisangin ai om tak a nit. **32** Amaah Pathian choiinrisangin a omin chu Pathian khomin amaah khan Miriam Naipa choiinrisang a ti, choiinrisang zel a ti. **33** Naihei, nin laiah zoro sot okkah om khai no ninge. Ne zong nin ta chu Judahei ki ti pek angkan nangni ki ti a nit, "Ki fena rangah fe thei no tin u". **34** Khante, atunah hin thupek ithar nangni ki pek a nit: luhgrithlung rei. Lung nangni ki thlung angka hin lung nin rithlung nget rang a nit. **35** Lung nin rithlungin chu mi tinin ki koilomhei nin nit iti riang an ti" a tia.

Peteran a phial rang thu Jisuan a rillok

36 Simon Peteran a ziangah, "Pumapa, takam ni fe rang?" itin ar dona. Jisuan a ziangah, "Ki fena ranga" h atun chu ne la zui thei no tin u, nikhomse, nakanah chu ne la zui nin ti" itin a sama. **37** Peteran, "Pumapa, ithom atun chu nang ki izui thei ino rang? Nangma rang sikin chu ki ringna khom peng ki ti" a tia. **38** Jisuan a ziangah, "Keima rang sikin ni ringna ni pek rang na? Thudik tak nang ke ril: ar khuang ma'nvoi thumka ne phial ni ti" a tia.

14

Jisua, Pa ziang fena lampui

1 Jisuan, "Nin ilung duk intong no rei, Pathian nin iam, kei khom ne iam sa rei. **2** Ki Pa inah omna itam takka a om, om no se chu nangni ki iril rang tak a nit; nin ta rangin mun isiam ki fe rang a nit. **3** Khante, nin ta rangin mun ki hang siam zoiin chu zuang kir nok ki ta, ki ziangah nangni thui ki ti, ki omnah nangni khom nin om theina rangin. **4** Ki fena rang lampui khom nin riat" a tia. **5** Thoman a ziangah, "Pumapa, ni fena rang re mang unge, khasikin ingkam a lampui kin riat ranga?" a tia. **6** Jisuan a ziangah, "Keimah hih lampui neh thutak neh ringna ki nit; keimaa fe no chu tute Pa

ziang thlung ngai make. **7** Keimah nin ne iriat ni se chu, ki Pa khom nin iriat rang tak a nit, atun chu amah nin riat tak, amah nin mu sa tak" a tia. **8** Filipan a ziangah, "Pumapa, Pa khah keimani nen mu ta, khanchu, kin ta rangin inrupa ti" a tia. **9** Jisuan a ziangah, "Filip, hi ten hih nin ziangah ki oma, khankhoma ni ne iriat ino mani? Tukhom ne mu chu Pa mu a nit. 'Pa khah keimani nen mu ta' ithom ni ti. **10** Keimah Paa ki om neh Pa keimaa ai om hih ni iam ino mani? Nin zianga thu ki isirhei hih keima iphuatot ni make, Pa keimaa om khan a sin ai tho lem a nit. **11** Keimah Paa ki oma, Pa keimaah a om ki tiah hin ne iam rei. Anitnole, ki sintho sik iluah hin ne iam rei. **12** Thudik tak nangni ke ril: tukhom ne iam kan chu ki sintho hih la sin a ti; anit, hi neka roiinpui ual khom la sin a ti, Pa ziangah ki fe rang sikin. **13** Khante, i khom ker minga nin ini ka chu sin ki ti, Naipa sika Pa choiinrisanga a om theina rangin. **14** Nangmanin ker mingin i khom nin ne ni'n chu amah khah sin ki ti.

Rithla Rithiang inkung khah

15 "Nangmanin lung nin ne thlungin chu, ki thupekhei zom nin ti. **16** Khanchu, Pa ziangah ning ki ta, aman Thlangampu dang nangni peng a ti; kumkhuaka nin zianga om rangin. **17** Amah khah Rithla diktak, Pathian thutak inlangpu a nit. Rammualin chu dong thei make, amah an mu thei no sik neh an riat thei no sikin. Khannise, nangmanin chu nin riat, nin ziangah a om mai sik neh nangmaniah a om mai sikin. **18** Ki fe khoma faran nangni marak no ninge; zuang kir nok ki ti. **19** Itoiteka nunga chu rammualin ne mu khai no ni; khannise, nangmanin chu ne mung nin ta, keimah ki ring sikin nangni khom ring nin ti. **20** Kha nikhuan chu nangmaniah ki om angkan, keimah ki Paah ki oma nangmani keimaah nin om iti re tang nin ti. **21** Tukhom ki thupekhei ihama zom chu lung ne thlung a nit. Tukhom lung ne thlung ka chu ki Pa khomin lungthlung a ti; kei khomin lungthlung ki ta, a ziangah inlar mai ngai ki ti" a tia. **22** Khante, Juda (Iskariota nino) khan a ziangah, "Pumapa, kin ziangah chu inlar ni ta, ithom rammual ziangah chu ni inlar ino rang?" a tia. **23** Jisuan a ziangah, "Tukhom lung ne thlung kan chu ken riseina thu zom a ti. Ki Pa khomin lungthlung a ta, ki Pa neh a

ziangah zuang kin ta, a ziangah om kin ti. **24** Tukhoin, lung ne thlung ino'n chu ken riseina thu zom ngai make. Khante, inriseina thu nin iriat hih keima ta ni make, Pa, ne tirpu rithoka a nit. **25** Nin zianga ki la om laiah hin hi thu ki isir a nit. **26** Khanchu, Thlangampu, Rithla Rithiang, Pan ker minga a zuk itir rang khan i tinreng nangni inrisei a ta, nangni ki isir pek takhei reng reng khah iremai rangin nangni siam a ti. **27** Nangni ki mak pek chu Thlangamna hih a nit; keima thlangamna keng nangni ki pek hi. Rammualin ai pek angka nangni pe mange. Nin ilung duk tong no sela, iti khom ti no rise. **28** Nangni ki mak rang a nit, nikhomse, nin ziangah zuang kir nok ki ti ki ti khah nin riat tak. Lung nin ne ithlung a nitin chu Pa zianga ki fe hih lom nin ti, Pa chu keima neka roiinpui ual a nit sikin. **29** Hi tong hih a hong tlung ma'n nangni ki lei iril a nit, a hong tlung tikah nin iam theina rangin, **30** Zoro sot uaiin chu nangni tongpui thei khai mange, hi rammual reng hih a hong chak tak sikin. Ki chungah richam nei make, **31** nikhomse, Pa lung ki thlung sikin ama thupek angka takin ki sin ngai iti hih rammualin a riat nget ai nang a nit. Thoi unla, hin taka rithokin lei suak ta rei u.

15

Jisua, Grep kung dik tak

1 Keimah Grep kung dik tak ki nita, ki Pa ar kul idonpu a nit. **2** Keimaa kop itang ira no chu a paia, a ra ka chu ar thialinfai ngai; a ra a tam ualna rangin. **3** Inriseina thu nangni ki pek tak sikah hin nin ifailang tak a nit. **4** Keimaah om mai unla, kei khom nangmaniah om mai ki ti. Itang khah grep kungah a kop mai non chu a khatin a ira thei ino angka takin, nangni khom keimaah nin om mai non chu ira thei no tin u. **5** "Keimah grep kung ki nita, nangmani a tanghei nin nit. Tukhom keimaah a om maia, kei khom amaah ki om maina chu itam takkan a ra ngai; keima boiin ite nin sin thei no sikin. **6** Tukhom keimaa om ino chu itang angkana paiin a oma, a char ngai; khanchu, an rikhoma, meiah an paia, a king ngai. **7** Keimaah nin om maia, ki thu nangmaniah a om maiin chu, nin inuam nuam zong rei mu mai

nin ti. **8** Itamka nin iraa hin ki Pa roinpuina inlangin ai om ngai a nit; khaangkan ki koilomhei nin hong init a nit. **9** Pan lung a ne ithlung angkan lung nangni ki thlung a nit; ki lungthlungin om mai rei. **10** Ki thupekhef nin zomin chu ki lungthlungin om mai nin ti, ki Pa thupekhei ki zdma a lungthlunga ki om mai angka hin. **11** Ki raifan nangmaniah a om theina rang neh nin raifan ar kip theina rangin amah hih nin ziangah ki isir a nit. **12** Ki thupek chu amah hih a nit: lung nangni ki thlung angka hin nangni khom lungrithlung rei. **13** Miriamin lungthlungna liantak a rualhei ta ranga ai nei thei chu an ta ranga a ringna pe hih a nit. **14** Ki thupek nin zdmn chu kknalhei nin nit. **15** Suak nangni ti khai no ninge, suakin chu a pu sintho a riat ngai no sikin. Suak nangni ti nekan mai keng nangni ki ti tak, Pa rithoka ki riat murdi nangni ke sir pek tak sikin. **16** Nangmanin ner thlang mak cheia, keiman nangni ki irthlang lem a nit; ifea ira itam takka va neia, nin ira om mai rangin nangni ki phun sa a nit, ker minga Pa zianga nin izong ka chu nangni a pek theina rangin. **17** Khasikin amah hih ki thupek a nit lungrithlung rei.

Rammual Neina

18 "Rammualin nangni a nelin chu keimah a ne lei nei bak tak iti remai rei. **19** Rammual mi ni unla chu rammualin ama ta angkan lung nangni ai thlung rang a nit. Khannise, rammuala rithoka nangni ki irthlang isua nin nita, rammual mi nin nit khai no sikin rammualin nangni ai nei a nit. **20** 'Suak hih a pu nekan lian make' iti thu nangni ki iril khah remai rei. Keimah nuamning a ne lon chu nangni khom nuamning nangni la long an ti; ken riseina thu an zomin chu nin inriseina thu khom zom an ti. **21** Nikhomse, khahei murdi khah ki ta nin nitna sikin keng nin chungah an itho rang, ne tirpu khah an riat no sikin. **22** Keimah izuanguin an ziangah thu isir non lang chu sual an inei ino rang pial; atun chu an sual phialna rang nei khai make. **23** Tukhom ne nelin chu ki Pa khom ai nei a nit. **24** Sin, mi dang tuten an lai tho ngai ino khah an laiah tho non lang chu, sual an inei ino rang pial; atun chu anni khan keimah neh ki Pa kin ruakan an ne mu taka, inei khom an ne inei tak a nit. **25** I khom nise, an Dan lekhabuah,

'Anmanin ite a bi boiin an ne nel' iti riziak khah a hong tlung theina ranga an itho a nit. **26** "Khante, Thlangampu, Rithla diktak, Pathian thutak inlangpu khah Pa zianga rithokin zuang a ti. Pa zianga rithokin nin ziangah zuk tir ki ta, ani khan ki thu isir a ti. **27** Khabanah, nangni khomin ki thu isir sang nin ti, a tir ata ki ziangah nin om sikin.

16

1 "Nin iamna nin mak nona rangin amah hih nangni ki isir pek a nit. **2** Inkhom ina rithokin nangni la umisuang an ta, nangni that itumhei khan Pathian sin an itho angkana an be zoro la hong tlung a ti. **3** Mipuiin nin chungah khangka khan la thong an ti, Pa neh keimah an ne riat no sikin. **4** Hi thurchi hih nin ziangah ki isir a nit, sin itho rangin an zoro a hong tlung tikin, nangni ki lei isir pek tak iti nin riatmai theina rangin.

Rithla Rithiang sintho

5 Hi thurchi hih a tir ata nangni ki la iril ino a nit. nin ziangah ki la om sikin, "Atun chu ne tirpu ziangah ki te rang tak keng, khankhoma nin laia tuten ki fena rang ner don mak chei. **6** Atun nangni ke sir pekin chu nin lungril ngaisiatin ai sip tak a nit. **7** Khannise, thudik tak nangni ke ril: ki fe chu nin ta rangin ai that a nit, ki fe non chu Thlangampu khah nin ziangah zuang no ni. Nikhomse, ki fen chu ani khah nin ziangah zuk tir ki ti. **8** Ani khah a zuang tikin chu soal lamah mo, thudikah mo, Pathian roirelna larrrah mo thiamno an chang tlia rammual mihei ziangah inmung a ti. **9** Soal lamah thiamno an ichang a nit, keimah an ne iam no sikin; **10** thudikah khom thiamno an ichang a nit. Pa ziangah ki fe rang sik neh nin ne mu khai no rang sikin; **11** roirelna lamah khom thiamno an ichang a nit, hi rammual ilal khom thiamno changin a om tak sikin. **12** "Nin zianga thu sir rang itamka ki la nei, nikhomse, nin rangin a re thiam lan tak rai a ti. **13** Nikhomsela, Rithla diktak, Pathian thutak inlangpu, khah a zuang tikin chu thutak tinrengah nangni ruai inlut a ti. Ama iphuatotin ite isir no nia. ai riathei khah isir lem a ta, thil hong itlung ranghei nangni ril a ti. **14** Ani

khan ne choiinrisang a ti, ki tong tihei khah ilan nangni a ril rang sikin. **15** Ki Pan ai nei ka chu ki ta a nit, kha sikah khan keng Rithlan ki taa mi lang a ta, nangni ril a ti, ki ti hi.

Ngaisiatna neh Lomna

16 "Itoitekah chu ne mu no tin ua, itoiteka nungah chu ne mu nok nin ti" a tia. **17** A koilom thenkaheiin, "Ei zianga a thusir hih im a omzia? itoitekah chu ne mu no tin ua, itoiteka nungah chu ne mu nok nin ti ai ti neh 'Pa ziangah ki fe rang sikin' ai ti hi. **18** 'Itoitekah' ai ti hih i a tina mani? A isir hih ei iriat ino keng" an tia. **19** Khante, Jisuan amah tong ridon an nuam iti a riata, an ziangah, "Itoitekah chu ne mu no tin ua. itoiteka nungah chu ne mu nok nin ti" ki ti kham ridon risaka nin init? **20** Thudik tak nangni ke ril: nangmani tap ikhekin om nin ta, rammual chu lom a ti; ngaisiatin om nin ta. nikhomse, nin ngaisiatna chu lomnan rilet a ti. **21** Nupangin naiha a tuang laiin chu ar ngai a siat ngai, a dengthei zoro a tlung sikin; nikhomse, ar thla zoiin chu a dengthei khah re nok khai ngai make, naite rammuala zuang isuak khah a lom sikin. **22** Nangni khom khangka khah nin nit: atun chu ngaisiatin nin om; nikhomse, nangni la mu nok ki ta. nin lungril lomnan la sip a ti, kha lomna khah chu tuten nangni sut thei khai no ni. **23** "Kha nikhuan chu ite ne ni khai no tin u. Thudik tak nangni ke ril: ker minga nin ini ka chu Pan nangni peng a ti. **24** Atun tenan chu ite ker mingin la ni mak chei; ni unla, mung nin ti, nin raifan ar kipna rangin.

Rammual Inena

25 "Kha thu khah tongrikhekin nin ziangah ki isir a nit. Nikhomse, tongrikhekin ni loiin ifel takkan Pa thurchi nin ziangah ke sir zoro la hong tlung a ti. **26** Kha nikhua khah a hong tlungin chu, ker mingin Pa ziangah i tika ni tang nin ti: 'keiman Pa ziangah nangni ni pek ki ti' ki tina ni make, **27** Pa ngei khan lung nangni a thlung sikin. Keimah lung nin ne thlunga, Pathiana rithoka zuang isuak ki nit iti nin iam sikin Pan lung nangni ai thlung a nit. **28** Pa zianga rithok ngeia zuang isuaka rammuala zuang ki

nita; atun chu rammual imaa Pa zianga fe nok rang tak ki nit" a tia. **29** Khante, a koilomheiin a ziangah, "Atun chu ifel takkan thu ne sira, tongrikhek reng mang khai mak chea. **30** Nangman tinreng ni riata, tuten ite nang an iril nang make iti atun chu kin riat tak. Hi sikah hin Pathiana rithoka zuang isuak ni nit iti kin iiam tak a nit" an tia. **31** Jisuan an ziangah, "Atun chu nin iiam tak? **32** Ringai rei, a zoro a tlung rang a nit tak, a tlung tian tak, kha tikin chu mahni in sengah rithekindar vang nin ta, ki khatin ne marak nin ti. Nikhomse, Pa khah ki ziangah a om sikin ki khat bang chu ni make. **33** Keimaah thlangamna nin nei theina rangin hi thu hih ki isir a nit. Rammualah hin intak ituangin om nin ti. Nikhomse, ihai takkan om rei! Keiman rammual ke ne tak" a tia.

17

A koilomhei ta ranga Jisua tongtaina

1 Jisuan khah a ti zoiin chu, rivan tiang a tanga, "Epa, a zoro a tlung tak. Ni Naipa roiinpuina pe ta roh. Naipa khomin roiinpuina nang a pek theina rangin. **2** Mi tinreng chungga thuneina ni pek tak sikin, ani khomin ni pekhei ziangah kumtluang ringna a pek theina rangin. **3** Khante, kumtluang ringna chu nangmah Pathian diktak nang iria neh ni tir Jisua Krista ria hih a nit. **4** Ni roiinpuina rinengah ken lang taka, sintum ni ne ipek khom ki sin zoi tak. **5** Epa! atun ni ziang ngeiah roiinpuina ne pe roh, rammual insiang maa ni zianga roiinpuina ki nei ngai kha. **6** "Rammual ata mi ni ne ipekhei ziangah nang ken puang tak. Khahei khah ni ta an nita, nangman keimah ni ne ipek a nit. Ni thu an zom taka, **7** i tinreng ni ne ipekhei hih ni zianga rithoka a nit iti khom atun chu an riat tak. **8** Thucha ni ne ipekhei khom ki peka an iham tak; ni ziang ata zuang ki nit iti khom an riatinfel taka, ni ne itir a nit iti khom an iam tak. **9** "An ta rang piala ngen ki nit. Rammual ta rangin ngen mange, nangma ta, keimah ni ne ipekhei ta rangin a nit. **10** Ki nei murdi ni ta an nita, ni nei murdi khom ki ta an nit, ki roiinpuina khom anmania ta a lang ngai. **11** Atun chu ni ziangah ki hong rang a nit tak; rammualah om khai no ninge, khan, anni chu rammualah la om an ti. Epa

Rithiang! Anni hih ner ming sinthotheinan ihoih roh, riming ni ne ipekah khan, keimah neh nangmah pumkah ei init angka anni khom pumkah an nit theina rangin. **12** An ziangah ki om lain chu ner ming sinthotheinan ke hoih ngai, riming ni ne ipekah khan. Ke hoih a, khatka lua rimang make, Pathian Thubu a tlung idikna ranga, ar mang rang pial banah chu. **13** Atun chu ni ziangah ki hong rang a nit tak, rammualah hi thuhei hih ke sir pek ki raifan an nei inrikipna rangin. **14** Ni thucha ki pek taka, rammualin a nei tak, rammual mi an nit no sikin, keimah rammual mi ki nit ino angka. **15** Rammual ata ilasuak rangin nang ngen manga, Mi Suala rithoka ihoih rangin nang ki ngen lem a nit. **16** Keimah rammual mi ki nit ino angka anni khom rammual mi ni make. **17** Thutakin thar roh, ni thu chu thutak a nit. **18** Rammualah ni ne itir angka keiman anni hih rammualah ki tir a nit. **19** An sik pialin ni ziangah ker thar, anni khom ni zianga thutaka an ritharna rangin. **20** "Hihei ta rang bangin nang ngen mange, an thusir sika ne iamhei ta rang khomin nang ki ngen a nit. **21** An rengkan pumkah an nit theina rangin nang ki ngen a nit. Epa, anni hih eimaniah om rise, nangmah keimaah ni oma, keimah nangmaah ki om angka. Pumkan om rise, rammualin ni ne itir a nit iti a iam theina rangin. **22** Roiinpuina ni ne ipek ngir khah anni ki pek a nit, nangmah neh keimah pumkah ei init angka pumkah an nit theina rangin. **23** Keimah anmaniah, nangmah keimaa omin, an inpum titakna rangin, khanchu, ni ne itir a nit iti rammualin riang a ta, lung ni ne ithlung angka anni khom lung ni thlung iti riang an ti. **24** "Epa, hi mi, ni ne ipekhei hih ki omnah ki zianga om rangin ki nuam, lung ni ne thlung sika rammual insiang maa ni ne ipek roiinpuina khah an mu theina rangin. **25** Epa Feltak! rammualin nang re make, keiman chu nang ki riat, hihei khom hin ni ne itir a nit iti an riat. **26** An ziangah nang ken puang taka, nang lan puang mai ki ti, lung ni ne thlungna khah anmaniah a oma, kei khom anmaniah ki om theina rangin" a tia.

1 Jisuan a tongtai zoiin chu, a koilomhei neh Kidron vatedung an rikana. Kha munah khan rikul a oma, amah khan Jisua neh a koilomhei an fea. **2** Anmanpu Juda khan khamun khah a riata, voi itam takka Jisua neh a koilomhei kha munah khan an ribuk ngai sikin. **3** Khasikin Juda khan Rom sipai lom neh thiampu lalhei neh Farisaihei itir, biak in ienkol ngaihei, ithuiin kha rikulah khan riamrei, meiserhei neh roserhei ichoiin an fea. **4** Thil hong om rangzia tinreng Jisuan a riat thlam sikin ma tiang a hong, "Tum nin izong?" itin ar dona. **5** Anni khan an sama, "Nazareth Jisua" an tia. Ani khan, "Keimah ki nit" a tia. An man rangpu Juda khom, an ziangah a dinga. **6** Jisuan an ziangah, "Keimah ki nit" a ti kaneh chu nung tiang an ritola, nuaiah an ilir taka. **7** A thar vangin Jisuan an ziangah, "Tum nin izong?" itin ar don noka. Anni khan "Nazareth Jisua" an tia. **8** Jisuan an ziangah, "keimah ki nit, nangni ki ti pek tak khate. Khangkan keimah nin ne izong a nitin chu a danghei hih chu fe ta rise" a ti peka. **9** (Jisuan hih a tina chu "Epa, ni ne ipekhei laia khatka lua inrimang mange" a lei iti khah a hong tlung idikna ranga a nit). **10** Khante, Simon Peteran khandai a neia, a thuata, Thiampu Laltak isom a sata, chang tianga a kuar a sat ithlak peka. Isom riming chu Malka a nit. **11** Jisuan Petera ziangah, "Ni khandai khah a kokah thun nok ta roh, ki Pan tuangna kilat a ne ipek hih ki in no rang ni son mani?" a tia.

Jisua Anna makungah a ngir

12 Khanchu, Roman sipai lom an ulian inchungtak neh Judahei manmiheiin Jisua an mana, an khuapa. **13** Khante, Anna ziangah an fepui baka. Ani khah Kaiafa tarpu a nita, Kaiafa khah kha kuma Thiampu Laltak a nit. **14** "Mi murdi rithula mi khatka thi chu a that" itia Juda thuneituhei irilpu khah Kaiafa hill a nit.

Peteran Jisua a phiulna

15 Khante, Simon Petera neh koilom dang khan Jisua an zuia. Koilom dang khah Thiampu Laltak melriat a nit sikin Thiampu Laltak in rikul

idenin Jisua ziangah a fea. **16** Khante, Petera chu daikotah a lei oma. Khanchu, koilom dang khah daikotah a va fe noka, nupangte ar sonpuia, Petera a hong thui inluta. **17** Daikota nupangte khan Petera ziangah. "Nang khom a koilom khatka khok ni nit ni makima?" a tia. Peteran, "Kei chu ni mange" itin a sama. **18** Khante. a dai sikin isomhei neh manmiheiin meiholin mei an scma. dingchungchoiin an uaa. Petera khom a fea. an ziangah mei iuan a va dinga.

Thiampu Laltakin Jisua tong ar donna

19 Khante, Thiampu Laltak khan Jisua ziangah a koilomhei thurchi neh an risei ngai dan thurchi ar dona. **20** Khante, Jisuan a ziangah. "Zorotin mi tin vantlang riatah thu ke sira; inkhom inah neh Biak inah, mipui ribuknah ken risei ngaia. Inrukkan ite reng isir ngai mange. **21** Khasikin ithom keimah te ni ne irdon? Ki thusir iriahei ridon roh ba. Im ki isir pek ngai an riat khate" a tia. **22** Khante, khangkana a tong lai takin khan. taka om manmi khatkan a bena, a ziangah. "Ingkanim Thiampu Laltak te khangkan ni tongpui ngam?" a tia. **23** Jisuan a ziangah, "Ki tin sualna a om duaiin chu. im ki tin sual, hi zakah mihei hih iril roh. Khannise, ki tin dik a nitin te, ithom ni ne iben?" a tia. **24** Khanchu, Anna khan ikhuap pumin Thiampu Laltak Kaiafa ziangah a tir taka.

Peteran Jisua a phial nokna

25 Khante, Petera chu mei iuan a la ding maia. Mi dangheiin a ziangah, "Nang khom a koilom khatka khok ni nit ni makima?" an tia. Khanchu, Peteran a phiala, "Kei chu ni mange" a tia. **26** Khante, Thiampu Laltak isom, Peteran a kuar ai sat pekpu suapuipa khan Petera ziangah, "Rikulah khan a ziangah nang ki mu ni makima?" itin ar dona. **27** A thar vangin Peteran, "Ni mange" a ti noka. Kha nung chu ar a khuang zel taka.

Jisua Pilata makungah a ngir

28 Jisua khah Kaiafa in ata zing takah governor inah an hong thuia. Juda

thuneituhei chu, dan angkana rithianga Kalkan Ruai ifa an nuam sikin governor inah lut make. **29** Khasikin Pilata tual a va suaka, an ziangah, "Hi mi hih im nin nona?" itin ar dona. **30** Anni khan. "Hi mi hin ite thonsual nei no sela chu ni ziangah hong thui no ning unge" itin an sama. **31** Khanchu, Pilatan an ziangah, "Nangmani ngeiin thui unla, nin danin a chungthu rel rei" a ti peka. Anni khan a ziangah, "Kin danin tute that rangin ne phal make" an tia an sama. **32** (A thi rang tlia Jisuan a lei isir angkan a hong tlung theina rangin khahei khah a hong iom a nit). **33** Khante, Pilata khah a inah a lut noka, Jisua a koia, "Judahei Reng ni nitim?" itin ar dona. **34** Jisuan a ziangah, "Hi tong hih nahgma lung suaka ni ne irdonim, anitnole, mi'n ki thurchi nang an isir pek sikam?" a tia. **35** Pilatan a ziangah, "Juda mi ni ne ison mani? Ni mihei neh thiampu lalhei keng ki kut chung a nang hong ipe. Im ni tho pek?" a tia. **36** Jisuan a ziangah, "Ki lalram chu hi rammual hih ni make, hi rammual hih ki lalram ni sela chu ki thuiruaiheiin doi an ta, Juda thuneituhei kutah ipe ni no ninge. Ki lalram chu hin ni make" a tia. **37** Khante, Pilatan, "Reng ni nitim?" itin ar dona. Jisuan a ziangah, "Reng ni nit ni ne ti khate. Thutak isir rang ringot hih rammualah ki suakna bi neh ki zuangna bi a nit. Tukhom thutaka omhei kan chu ki he an ringai ngai" itin a sama. **38** Pilatan, "Khate im thutak?" itin ar dona.

Jisua ithat ranga an relna

Khante, Pilata tual a va suak noka, mipuihei ziangah, "Thiamno inchang rangin ite a bi mu mange. **39** Nikhomse, nin dan angkan, Kalkan Ruaithe zoron mi tang khatka nangni ken zok pek mai ngaia. Judahei Reng hih nangnin zok pek inlang nin nuamim?" a tia. **40** Khante, anni khan ikhek pumin an sama, "Nuamang unge, amah chu ni no rise. Barabba keng kin inuam!" an tia. (Barabba chu suammi a nit).

19

1 Khante, Pilatan Jisua a thuia, a zepa. **2** Sipaiheiin riling lukhum an

siama. an inkhuma khanchu, zakorfual senduk an inhaka, **3** A ziangah an hong, "Judahei Reng ring sot roh" itin an ibena. **4** Khante, Pilata a va suak noka, mipuihei ziangah, "En ta u, thiamno inchang rangin ite a sualna bi mu mang iti nangnin mu rangin nin ziangah ki la hong ithui a nit" a tia. **5** Khanchu, riling lukhum ikhuma, zakorfual senduk ihakin Jisua a hong suaka. Pilatan an ziangah, "En rei! hi mi hih a nit" a tia. **6** Khanchu, thiampu lalhei neh manmiheiin amah an mu kaneh chu an ikheka, "Krosah hemde roh, krosah hemde roh" an tia. Pilatan an ziangah, "Kha non chu, thui unla, nangmanin krosah hemde rei. Thiamno inchang rangin ite a sualna bi mu mange" a tia. **7** Mipuihei khan, "Pathian Naipan ar be sikin a thi rang a nit iti dan kin nei" itin an sam noka. **8** Pilatan kha tong khah a riatin chu a ti nok ual taka. **9** Insung a lut noka, Jisua ziangah, "Taka mi'm ni nit hi?" itin ar dona. Khannisela, Jisuan sam make. **10** Kha nung chu, Pilatan a ziangah, "Ni ne isam no rang mani? Nang inzok theina neh nang hemde theina thu ki nei iti re roh" a ti peka. **11** Jisuan a ziangah, "Pathianin nang a pek sik ringotin ki chungah thu ni nei a nit. Khasikin ni kuta ne pepu khah a soal an rik ual a nit" a tia. **12** Khante, kha thu khah a riatin chu, Jisua an zokna rang lam a ngaituaa. Khannisela, mipuiheiin an ikhek khuma, "Nen zokin chu Kaisara mai ni nit ino a nit. Tutu renga ribe ka chu Kaisara doia rihel an nit" an tia. **13** Khante, kha tong khah Pilatan a riat kaneh chu, Jisua tualah a thuia, roirelpu thungna mun 'Lungdap' Hebrai tonga 'Gabbatha' an itiah khan a thunga. **14** Kha ni khah Kalkan Ruai inrinni a nita, sunlai tak vel a nit. Pilatan mipuihei ziangah, "Hi te hih nin Reng!" a tia. **15** An ikhek noka, "That roh! That roh! Krosah hemde roh!" an tia. Khanchu, Pilatan an ziangah, "Nin reng krosa hemde rangin nin ne inuam mani?" itin ar dona. Thiampu lalheiin, "Kaisara bang keng reng kin inei" itin an sama. **16** Khanchu, Pilatan Jisua khah krosa hemde rangin an kutah a bang taka. Khanchu, Jisua khah an thui tak.

Jisua ihemdea a om thu

17 Khante, Jisuan a kros riputin 'Luru Mun' Hebrai tonga Golgotha an iti denin a fea. **18** Kha munah khan krosah an hemdea, mi dang inika an

hemde saa, a sir seng sengah, an lainah Jisua. **19** Pilatan inriatna "Nazareth Jisua, Judahei Reng" iti riziak kros lerah a tara. **20** Mi tam takkan an tepa, Jisua an hemdena mun khah khopui ata a lat no sikin. Inriatna khah Hebrai tong, Rom tong, Grik tong heia riziak a nit. **21** Khante, thiampu, lalheiin Pilata ziangah, "Judahei Reng" itin riziak no roh, aman keng "Judahei Reng ki nit ai ti" itin riziak roh, an ti peka. **22** Pilatan, "Ki irziak khah riziak a nit tak" itin a sama. **23** Sipaiheiin Jisua an hemde zoiin chu, a silbom, rangtum ilikan an thena, an risema, sipai khatkan rangtum khatka chit an donga. A zakorfual khom an laka, amah khah thuilo zakuaa khong a nit. **24** Sipaihei khan "Ithet no min, tum a dong rang thlasan ei ti u" an ritia. Pathian Thubu'n, "Ki silbom an khatin an risema ki zakorfual rangin thla an san" ai ti khah a hong tlung idikna rangin amah khah sipaiheiin an itho a nit. **25** Jisua kros kola dinghei chu, a nu, a "nu'n zirpuinu, Mari, Klopa nupui neh Mari Magdalini hei an nit. **26** Khante, Jisuan a nu neh koilom lung ai thlung khah a kola dingin a mua, a nu ziangah, "Nupangnu, en ta, ni naipa hi" a ti peka. **27** Khante, koilom ziang khomah khan, "En ta, ni nu hi" a ti peka. Kha zoroa rithokin chu koilom khan a ina om rangin khamnu khah a thui taka.

Jisua thina thu

28 Khante, Jisuan atun chu i tinreng ar zoi tak iti a riatin, Pathian Thubu tlung idikna rangin, "Ki tui ar hal" a tia. **29** Khante, kha munah khan uain thura sip bel khatka a oma, tuithop uainah an ichiaa, husop irolin an tara, a mur an hang ithluna. **30** Khante, Jisuan uain thur khah a in zoiin chu "Ar zoi tak" a tia. Kha nung chu a lu a khuna, a thi tak.

Jisua kang an sun thu

31 Khante, kha ni khah Tlanni a nita, Juda thuneituheiin Sabbathnia kros lera ruak iom mai an nuam no sikin an ihemdehei ke ikhiaka an ruakhei ithum rangin Pilata an ngena. **32** Khanchu, sipaihei khah an fea, Jisua loma an ihemdehei tongtira neh mi dang kehei chu an ikhiaka. **33** Khannisela,

Jisua kolah an hongin chu a thi tak iti an riata. Khasikin a ke khom ikhiak make. **34** Sipai khatkan a feiin Jisua kang a hang suna, khancel thisen neh tui a suak taka. **35** (Hi thil imupu hin nangni khom nin iamna rangin a isir a ait. A isir hih a dika, thutak a nit iti khom a riat). **36** Pathian Thubu'n, "A ru khatka khom ikhiak ni no ni" ai ti khah a hong tlung idikna rangin amah khah a hong iom a nit. **37** Pathian Thubu ngirin, "An isunah khah la en an ti" a ti saa.

Jisua iphuma a omna thu

38 Kha zoiin chu, Arimathaia kho mi Josef an Pilata ziangah Jisua ruak ila rangin a ngena. (Josefa khah Juda thuneituhei ti sika inrukka Jisua zuipu a nit). Pilatan ruak ila rangin a phala, khanchu, a laka, a fepui taka. **39** Nikodema, matona zana Jisua zianga hongpu khan namhoi, murra neh aloe ripol kilogram somithumka vei ichoiin Josefa a zui saa. **40** Khante, an ruakan Jisua ruak khah an choia, Judahei riphum ngai danin namhoi neh risom puanin an tuama. **41** Jisua an thatna munah khan rikul khatka a oma, kha rikul sungah khan tute an la phumna ngaino ithlan ithar khatka a oma. Khante, Sabbathni rang a nit tak sikin neh ithlan khah a nai sikin. amah khan Jisua an phum tak.

20

Ithlan khorong

1 Pathianni zing takah, a la zing laiin, Mari Magdalini ithlanah a fea. ithlan kotbaia lung khah iritum paiin a va mua. **2** Khanchu, Simon Petera neh koilom dang Jisuan lung ai thlung ziangah khan a tlana, an ziangah. "Ithlana rithokin Pumapa khah an laka. an siana re khai mange" a tia. **3** Khanchu, Petera neh koilom dang khah ithlanah an fe taka. **4** An ruakan an itlana, koilom dang khan Petera a khela, ithlan a tlung masaa. **5** A khuna, risom puan zuat a mua, a sungah chu lut make. **6** A nungah Simon Petera a zuanga, ithlanah a lut thala. Risom puan zuat chu a mua. **7** Jisua lu tuam

ipuan khah chu risom puan zuat neh om loia, a khata rizuatin a mua. **8** Kha nung chu, koilom dang, ithlan tlung masapu khom khah a luta, a mua, a iam taka. **9** (Pathian Thubu'n, thina rithokin la thoinok a ti, ai ti khah la re ngir maka) **10** Khanchu, koilomhei khah an inah an fe nok taka.

Mari Magdalini ziangah Jisua an lar

11 Khannise, mari chu tap pumin ithlan pu tiang a dinga. Tap pumin a khuna, ithlan sung a venga. **12** Vantirton inika, a ngoia rivon. Jisua an inzalna lu thlun tiang khatka pheih thluan tiang khatka thungin a mua. **13** Khahei khan a ziangah, "Nupangnu, ithom ni tap?" itin an ridona. Ani khan an ziangah. "Ki Pumapa an laka, an siana re khai mange" a tia a sama. **14** Khante, a hang rihelin chu. Jisua ding a mua, nikhomse. Jisua a nit iti re maka. **15** Jisuan a ziangah. "Nupangnu, ithom ni tap? Tum ni zong?" itin ar dona. Ani khan rikul ienkolpu a sona, a ziangah, "Epu, ni lak a nitin chu ni siana ne ril roh, feng ki ta, ki laka rang" a tia. **16** Jisuan a ziangah, "Mari" a tia. Khanchu, a tiang a ngata. Hebrai tongin, "Rabboni!" a tia. (Amah khah Minriseipu tina a nit). **17** Khante, Jisuan a ziangah, "Ne ton no roh. Pa ziangah la fe mange. Nikhomse, ki suapuihei ziangah fen la, ki Pa an Pa, ki Pathian an Pathian ziangah ki kirnok rang tak a nit iti va ril roh" a tia. **18** Khanchu, Mari Magdalini khah a fea. Pumapa a mu tlia neh a irilhei khah koilomhei a va sir pek taka.

A koilomhei ziangah Jisua an lar

19 Pathianni kholoi a nita, Juda thuneituhei an ti sikin, koilomhei khah insungah inkhar rikalin an ribuka. Khante, Jisua a hongga, an laiah a dinga, "Nin chungah thlangamna om rise" a tia. **20** A ti zoiin chu a kuthei neh a kang an ena. Pumapa an mua, koilomhei khah raifanin an sip taka. **21** A thar vangin Jisuan an ziangah, "Nin chungah thlangamna om rise" Pan a ne itir angkan Kei khomin nangni ki tir a nit" a ti pek noka. **22** Khanchu, ar thuak khuma, an ziangah, "Rithla Rithiang nei rei. **23** Tu sual khom nin iza ka chu iza ning a ta, nin iza no ka chu iza ni no ni" a tia.

Jisua neh Thoma

24 Khante, Jisua a hong laiah khan koilom somleinikahei laia Thoma (Phira an iti) khah an laiah omaka. **25** Khasikin, koilom dangheiin "Pumapa kin mu tak" an ti peka. Thoman an ziangah, "A kuta perek behei ki mu noa, kha perek behei khah ke khik noa, a kanga sabe khom ki ton no zelin chu iam no ninge" a tia. **26** Haptaka nungah chu koilomhei khah insungah an ribuk noka, Thoma khom an ziangah a om saa. Inkharhei khah ar kal a nit, khannise, Jisua a hongah, an laiah a dinga, an ziangah, "Nin chungah thlangamna om rise" a tia. **27** Khanchu, Thoma ziangah, "Ki kuthei ikhi inla, en roh; hei iban inla, ki kang khom ton roh. Ringla khai non la, iam ta roh" a ti peka. **28** Thoman a ziangah, "Ki Puma neh ki Pathian ni nit" itin a sama. **29** Jisuan a ziangah, "Ni ne mu sika ni ne iiam mani? Ne mu loia ne iamhei chu mi hamtha an nit" a ti peka.

Hi Lekhabu thiltum

30 A koilomhei mu chungah sinrikhel itam takka a thoa, khahei khah hi lekhabuah hin riziak ni make. **31** Nikhomse, Jisua hih Messia, Pathian Naipa a nit iti nin iam theina rang neh amah nin iamna sika ringna nin nei theina ranga hi hei hih chu riziak a nit.

21

Koilom sarikahei ziangah Jisua an lar

1 Kha rizoiin chu, Tiberia dilah a koilomhei ziangah, Jisua an lar noka. Hingkan an lar: **2** Simon Petera, Thoma (Phira an iti) Nathanaela (Galili ram Kana mi) Zebedeia naihei neh Jisua koilom dang inikahei neh an ribuka. **3** Simon Peteran a danghei ziangah, "Inga man rangin feng ki ti" a tia. Anni khan a ziangah, "Keini khom zuang sang kin ti" an tia. Khanchu, rikuangin an fe taka, nikhomse, kha ni zanin chu ite man make. **4** Ini a hong suakin chu Jisua vakolah a dinga, khan, koilomhei khan Jisua a nit iti re make. **5** Khante, Jisuan an ziangah, "Tlangvalhei, ite nin iman ino

mani?" itin ar dona. Anni khan, "Ite man mang unge" itin an sama. **6** Ani khan an ziangah, "Rikuang chang tiangah khan deng unla, man nin ti" a tia. Khaangkan, an denga, inga tam rai sikin rikuangah kaiisua thei khai maka. **7** Koilom Jisuan lung ai thlung khan Petera ziangah, "Pumapa keng a nit so te" a ti peka. Khante, Peteran Pumapa a nit iti a riatin chu a zakua a vonga (koronga om a nit sikin) tuiah ar chom taka. **8** Koilom danghei chu rikuingin vakolah an hong, inga sip ngit kan len khah an kaiisua. Imuang ata la make mitar rizaka vel bang a nit **9** Vapang an hong suakin chu meihola sem mei, inga neh ibai a chung a om an mua. **10** Khante, Jisuan an ziangah, "Atun lelea nin inga man khah thenkah hin hong choi ta u" a tia. **11** Khanchu, Simon Peteran rikuinga chuangin inga lianpa pa sipin len khah a kaiisuaa, a rengkan riza lei somringaka ithumka a nit; khador inga tam khom se len chu tet make. **12** Jisuan an ziangah, "Hong unla, fa ta rei" a ti peka. Koilomhei laia tuten "Tum ni nit?" iti khomin ridon ngam maka, Pumapa a nit iti an riat infel sikin. **13** Khante, Jisua a fea, ibai a laka a sem peka, inga khom khangka vangin a sem pek noka. **14** Amah khah Jisua thina rithoka a thoinok nunga a koilomhei zianga an lar a voi thumna a nit.

Jisua neh Petera

15 An fak zoiin chu Jisuan Simon Petera ziangah, "Simon Johana naipa. Hihei lung ne thlung nekah hin lung ni ne thlung ualim?" a tia. Ani khan a ziangah, "O, Pumapa, lung nang ki thlung iti ni riat" itin a sama. Jisuan a ziangah, "Ki beratehei donsui roh" a ti peka. **16** A voi niknan Jisuan a ziangah, "Simon Johana naipa, lung ni ne thlungim? a tia. Ani khan a ziangah, "O, Pumapa, lung nang ki thlung iti ni riat" itin a sam noka. Jisuan a ziangah, "Ki berahei donsui roh" a ti peka. **17** A voi thumnan Jisuan a ziangah. "Simon Johana naipa, lung ni ne thlungim?" a ti pek noka. Jisuan a voi thumnan "Lung ni ne thlungim?" a ti pek nok sikin Petera ringai a siat taka. Khanchu, a ziangah, "Pumapa, i tinreng ni riata, lung nang ki thlung iti khom ni riat" a tia. Jisuan a ziangah, "Ki berahei donsui roh. **18** Thudik tak nang ke ril: ni naiinpang laiah khan chu ner siama, ni nuamna tiang tiang ni fe thei ngaia. Khannise, ni unlian tikin chu ni kut phar ni ta. mi'n

nang khuap pek an ta, ni nuam nona tiang tiang nang thui an ti" a ti peka.

19 (Kha thu Jisuan a sir pekna chu Pathian roiiipuina ranga Petera thi rang tlia riatna ranga a nit). Kha nung chu, Jisuan a ziangah, "Ne zui roh" a ti peka.

Jisua neh koilom dang

20 Khante, Petera a ngat zuai zuaiin chu koilom dang Jisuan lung ai thlung, bu an nek laia Jisua tiang hei riona, "Pumapa, tum nang inman rang?" itia ridonpu khah a nungah a mua. **21** Peteran ani khah a mu'n chu Jisua ziangah. "Pumapa, himpa rek hin te im a tho rang?" itin ar dona. **22** Jisuan a ziangah, "Ki zuang nok maka ring mai rangin nuam ngan inlang im ni lo rang? Ne zui zel roh" itin a sama. **23** Khante, kha koilom khah thi no ni itin Jisua zuihei laiah an thang taka. Khannisela, Jisuan thi no ni ti maka. "Ki zuang nok maka ring mai rangin nuam ngan inlang im ni lo rang?" keng ai ti. **24** Kha koilom khah hi thu sirpu neh riziakpu a nit; a thu sir khom a dik iti ei riat.

Thu kharna

25 Khante, Jisua sintho a dang itam takka a oma. Khahei khah riziak infai riai rang ni ta sela chu, lekhabu riziak kha chu rammualah khom ikeng rangin iam mange.